

## BAB TIGA

### PEMBUKAAN PULAU PINANG DAN HUBUNGANNYA DENGAN PROSES PEMBENTUKAN SEMPADAN PERTAMA: 1800-1869

#### 3.0 LATAR BELAKANG

Kuasa British pada peringkat awal kedatangan mereka cuba mendapatkan sekurang-kurangnya sebuah pulau dari kerajaan tempatan. Pulau tersebut pada umumnya tidak mempunyai nilai yang tinggi dari segi hasil mahsul, hasil hutan dan juga kesesuaian pertanian. Pulau tersebut juga tidak penting dari segi sistem laluan perdagangan tradisional. Dengan demikian adalah agak mudah bagi mereka mendapatkannya dari pemerintah tempatan. Dalam kajian ini Pulau Pinang telah dipilih oleh kuasa British. Pembukaan Pulau Pinang sebagai sebuah pelabuhan perdagangan telah menggugat sistem pentadbiran, sosial dan ekonomi kerajaan-kerajaan Melayu di Segenting Kra yang dijelaskan sebelum ini dan seterusnya telah mendorong kepada pembentukan sempadan pertama mengikut konsep dunia barat.

Sejarah telah memperlihatkan terdapatnya dua siri usaha pengembangan perdagangan British ke negeri Melayu. Siri pertama pada akhir abad ke-16 dan ke-17. British telah bertapak di Patani pada tahun 1612 dan tersingkir kemudiannya pada tahun 1622 oleh Belanda. Kemudian mereka bertapak di Ambon pada awal tahun 1620an dan di Kedah pada tahun 1669, bagaimanapun tidak kekal lama. Satu lagi siri kedatangan mereka ialah pada akhir abad ke 18. Kedatangan pedagang British ke Kedah adalah serentak

dengan di Balambangan, kepulauan Sulu.<sup>1</sup> Perjanjian dagang ditandatangani oleh Kapten Francis Light yang menjadi Agen Pedagang Mr. Francis Jourdain, dengan pemerintah Kedah Sultan Mohammad Jiwa pada akhir tahun 1771. Kemudiannya oleh Edward Monckton wakil Gabenor General di India pada 20 April 1772. Semua ini memberi laluan kepada British untuk berdagang dengan Kedah. Kapten F. Light dan Syarikat Hindia Timur (East India Company-EIC) tidak sekadar mahu berdagang, tetapi mahukan satu kawasan yang boleh dijadikan hak milik untuk dijadikan pusat perdagangan mereka di sini. Pusat ini akan berperanan mengumpul dan memasarkan hasil dagangan di persekitaran untuk berdagang dengan negeri China dan juga untuk keperluan di England sendiri. Bagaimanapun mereka kemudiannya sekali lagi terpaksa keluar dari Kedah dan juga Balambangan pada tahun 1773.<sup>2</sup> Kegagalan ini tidak mematahkan semangat EIC. Mereka terus mencari tapak di rantau ini.


Dalam masa pencarian ini F. Light mendapat tawaran dari Kedah untuk menduduki Pulau Pinang dan juga Ujong Salang oleh kedua-dua pemerintah tersebut; iaitu Sultan Abdullah Mukaram Shah (1778-1797), Sultan Kedah ke 20 dan juga Gabenor Siam di Pulau Ujong Salang, Phya Phimon.<sup>3</sup> F. Light membuat permohonan kepada pihak berkuasa Syarikat Hindia Timor di Culcutta, bersama dengan syarat syaratnya. F. Light lebih tertarik dengan Ujong Salang<sup>4</sup> tetapi EIC lebih berminat kepada Pulau Pinang. Pada asasnya penawaran akan pulau-pulau ini kepada F. Light dan EIC adalah sebagai satu

usaha perlepasan diri para pemerintah Kedah dan Ujong Salang dari bayangan kekuasaan Siam dari Ayuthia. Dengan ini pendudukan F. Light ke atas Pulau Pinang di atas perkiraan bahawa Sultan Kedah adalah seorang pemerintah yang berdaulat dan merdeka. Kedah dengan mudah melepaskan Pulau Pinang kerana beranggapan pulau itu tidak mempunyai nilai ekonomi dan tidak strategik bagi tujuan jalan laluan perdagangan. Di samping itu, ia juga menjadi sarang lanun.<sup>5</sup>

Atas kepentingan mahu berdagang dengan negeri China melalui hasil mahsul keluaran Asia Tenggara, khususnya negeri Melayu, British telah bertapak di Pulau Pinang. Barang keluaran dari rantau ini amat diperlukan oleh British untuk kegunaannya di England, di samping menjadi bahan untuknya berdagang dengan China. Ini kerana mereka perlukan barang dagangan dari China seperti teh dan sutera, manakala China pula tidak memerlukan barang dagangan dari Barat seperti barangan besi, senjata, kain bulu dan lain-lain. Oleh yang demikian barang dari kawasan ini dijadikan pertukaran dengan China. Sementara itu masyarakat tempatan pula memerlukan barang dari China dan barang dari Eropah.<sup>6</sup>

Pendudukan ke atas Pulau Pinang diistiharkan oleh Kapten Francis Light pada 11 Ogos 1786 hanya dengan berdasarkan kepada **Surat Keterangan** (Kedah Document) sahaja. Surat ini tidak pernah ditandatangani. Semasa surat ini dirujuk ke EIC di India dan kemudiannya ke England, F. Light terlebih dahulu menduduki Pulau Pinang selepas mengadap Sultan

Peta 3.1. Pulau Pinang Wilayah Kedah




Sumber: ANM, No. K27 (UBAHSUAI)

Abdullah Mukaram Shah II, sultan ke 20 (1778-1797) pada 8 Julai. Ketidakpastian dan kesahihan pendudukan ini hanya diketahui oleh F. Light sahaja. Demikian juga kedudukan dan taraf kerajaan Kedah itu sama ada ia dilindungi atau di bawah perintah Siam ataupun ia sebuah kerajaan yang merdeka dan bebas. Walau apa pun status negeri Kedah, pegawai Siam telah pun mengetahui pendudukan ini pada 2 Ogos 1786 iaitu 10 hari sebelum pengistahanan di buat.<sup>7</sup>

Tujuan utama pendudukan ini untuk menjadikan Pulau Pinang sebagai tempat pengumpulan barang dagangan di persekitaran Selat Melaka. Selain daripada itu ianya juga keperluan persinggahan kapal-kapal dagang, tempat baik pulih kapal-kapal kerajaan, EIC dan kapal-kapal dagang "country traders". Pelabuhan ini juga akan dijadikan sebagai sebuah pelabuhan bebas dan pada masa yang sama akan dijadikan sebagai Pengkalan Tentera Laut.<sup>8</sup>

Pendudukan ini kemudiannya nanti akan memberi kesan buruk kepada perdagangan Kedah. Sultan Kedah tersepit antara harapan persahabatan dengan F. Light yang semakin tipis, sementara pada masa yang sama menerima tekanan yang semakin mendesak dari Siam melalui Ligor.<sup>9</sup> Akhirnya F. Light memaklumkan bahawa pihak atasannya tidak dapat memenuhi permintaan sultan untuk membantu mempertahankan Kedah dari serangan musuh. Apa yang lebih mendukacitakan baginda ialah Pulau Pinang terus diduduki dan berkembang sebagai sebuah pelabuhan perdagangan. Sebagai jalan keluar, dengan bantuan iparnya Tunku Long Puteh, satu ketumbukan

Gambar 3.1. Pengistiharan Pendudukan Keatas Pulau Pinang



Sumber: UDSJ, Jil.4. No1,1970.

pasukan tentera telah dikumpulkan untuk menyerang Pulau Pinang dari Kuala Perai pada awal tahun 1791. Bagaimanapun F. Light lebih pantas dengan memerangi ketumbukan tersebut. Ia berakhir dengan satu perjanjian damai pada 1 Mei 1791. Perjanjian ini telah memperakui dan memperkuuhkan kedudukan F. Light dan EIC di Pulau Pinang.<sup>10</sup>

Pembukaan Pulau Pinang telah menimbulkan satu era baru dalam pemerintahan dan perdagangan di Kedah. Jika sebelum ini pedagang-pedagang dari Barat (EIC) datang berdagang di pelabuhan-pelabuhan Kedah, tetapi kini Kedah pula terpaksa berdagang dengan Pulau Pinang yang dikuasai oleh pihak British. Sultan Kedah telah mengalami kerugian besar apabila pedagang-pedagang tempatan yang dahulunya berdagang dengan Kedah kini telah berdagang dengan Pulau Pinang. Keadaan ini meninggalkan kesan yang mendalam kepada pemerintah Kedah. Ini disebabkan dari tahun ke tahun pendapatan perdagangan Kedah dan sultan memperlihatkan jumlah yang semakin merosot.<sup>11</sup>

Pembukaan Pulau Pinang bukan sahaja memberi kesan kepada Kedah, malah dirasai juga oleh negeri-negeri pantai timur seperti Patani-Kelantan, Singgora, dan Ligor. Oleh kerana Patani sudah ditakluki oleh Siam sejak 1786 dan negerinya masih huruhara akibat pemberontakan pada tahun 1791, maka kesannya tidak begitu terasa. Bagi Ligor, tindakan Kedah menyerahkan Pulau Pinang tanpa merujuk kepadanya dan juga Raja Besar Siam, seolah-olah membelakangi dan mencabar kewibawaan mereka.

Ditambah pula oleh mengalirnya hasil dagangan bagi kawasan di bawah naungannya (Ligor) seperti dari Ranong di utara sampai ke Trang di selatan ke Pulau Pinang. Hasil mahsul ini tidak lagi diperdagangkan ke Ligor untuk dibawa ke Bangkok, tetapi dibawa ke Pulau Pinang. Hal ini telah memberi kesan kepada dagangan Ligor dan Siam, yang selama ini banyak menerima bekalan dari negeri-negeri di pantai barat yang bernaung di bawahnya.<sup>12</sup>

Siam dan Ligor semakin tercabar apabila Kedah buat kali keduanya menyerahkan pula kawasan di seberang Pulau Pinang yang kemudiannya dikenali sebagai Province Wellesley kepada British, pada tahun 1800.


Perbincangan seterusnya akan menggambarkan perihal keadaan Pulau Pinang sebagai sebuah pulau dalam wilayah Kedah, yang pada penilaian Kedah tidak berpotensi. Pulau ini mempunyai daya tarikannya yang tersendiri kepada Inggeris. Digambarkan juga kemudiannya keadaan Province Wellesley yang amat bernilai kepada pihak Inggeris, yang akhirnya telah menjuruskan kepada proses pembentukan sempadan.

### **3.1 GAMBARAN AWAL PULAU PINANG**

Gambaran pulau ini dari segi kedudukan, keluasan, bentuk muka bumi, hasil dan keadaan cuacanya dapat dilihat dari penjelasan surat F. Light bertarikh 29 April 1787. Beliau menggambarkan:<sup>13</sup>

"The island is in length from north to south about 16 miles, its medium breath I take to be 8 miles, so that in all it contains 128 square miles-its interior parts mountainous lands, but in

Peta 3.2. Lakaran Kasar Pulau Pinang dan Prince Wellesley



Sumber: ANM No.P48.

general low towards sea side, and so covered with wood that it is impossible for any body of men to penetrate, and what will (with attention in those that may be entrusted with clearing it) ever remain a security to the settlement against attack by land.

The soil is in general light and sandy, but fertile, and every where mixed with avery productive tin ore which may hereafter prove an object to the Hon'ble Company, but....

The timber of the island is in general durable, and fit for ship building and etc.

As a marine port, its insular and central situations, fine, defensible and covered; -harbour of easy access and recess, in all seasons provide amply for the shelter of a fleet.

Its fine climate, fertile soil, and contiguity to a plentiful country, where provisions may be had until raised on the island, provide for the health and refreshment of the seaman"

Tambahan gambaran di atas terdapat dalam laporan Kapten Kyd pada 1 September 1787.<sup>14</sup> Demikian juga keadaan pelabuhannya yang baik dari segi keselamatan dan kedalamannya untuk tujuan kapal berlabuh dapat dilihat sebagaimana catatan F. Light dalam surat yang sama:<sup>15</sup>

"To improve the harbour accurate draughts of the island and surrounding coast are neccessary to enable every commander to find the shelter he may want with expedition and safety.


As the tide rises and falls 9 or 10 feet, docks might be constructed, but as heaving down hulks is always are source attended with much less expense and as the building of them here would raise a body of workmen ready in case a fleet should arive in what assistance...."

Bagi menjamin keselamatan dan keberkesanan pelabuhan, Kapten Glass telah menulis usaha-usaha yang sedang dilakukan:<sup>16</sup>

" Captain Kyd is now well advanced in his survey of the harbour, and I believe his report will be favorable. But whatever alteration may be determined on, I am now convinced that while the Company keep possession of the island, the point we at present occupy will ever remain the principal trading, on account of its easy access and recess, and as it will be along time before another work can be completed (supposing it to be found necessary), I have therefore with the advice of Mr. Light began to strengthen the fort by doubling it with another row of nebongs, and by raising stages in the inside, high enough to fire over the parapet. The undertaking has also met with Captain Kyds approbation, as I am carrying it on with the lascars and working parties from the sepoy corps, it will not be attended with any expence, nor will my employing the sepoys for a few hours in the day, I hope, prove prejudicial to good order and discipline, on the contrary, I think it will wean them for the vice of gambling, which had from the example of the natives begun to shew itself among the troops, and as it will add greatly to the safely of the place, I trust your Lordship will approve it."

Kapten Kyd dalam surat yang sama juga turut memberikan pandangannya<sup>17</sup>. Pulau Pinang bukanlah pulau yang tunggal. Ia dikelilingi oleh pulau-pulau kecil yang lain.<sup>18</sup> Fort Cornwallis merupakan pusat pentadbiran Pulau Pinang terletak di hujung tanjung mengadap ke tanah besar. Di utara dan di belakangnya dilingkungi oleh tanah tinggi sementara di selatannya terdiri daripada tanah pamah yang dipisahkan oleh sebatang sungai. Ini menjadikannya amat sesuai dan strategik untuk dijadikan pelabuhan, pusat pentadbiran, dan pengkalan tentera laut. (lihat peta).

Peta 3.3. Kedudukan Fort Cornwallis dan Pelabuhan Dengan Tanah Besar



Sumber: CO700 No.38 (UBAHSUAI)

### **3.2. PERKEMBANGAN PULAU PINANG**

Segala keperluan keselamatan dan kemudahan di pelabuhan yang disediakan oleh Pulau Pinang telah menarik ramai penduduk untuk menetap dan berdagang di pulau itu. Semasa F. Light mendarat, Pulau Pinang hanya didiami oleh sebilangan kecil orang Melayu, yang bekerja sebagai nelayan dan pengumpul hasil hutan. Dibeberapa lokasi tertentu di pulau itu merupakan sarang Ianun.<sup>19</sup> Perpindahan beramai-ramai penduduk dari tanah besar bermula seminggu selepas F. Light mendarat. Jumlah mereka dari setahun ke setahun semakin bertambah. Bermula dari kira-kira 58 orang, ia telah bertambah kepada lebih kurang 30,000 orang pada tahun 1820 seperti yang ditunjukkan dalam Jadual 1 di bawah:<sup>20</sup>

**Jadual 3.1: Data Penduduk Pulau Pinang Antara Tahun 1788-1820**

TAHUN	JUMLAH (ORANG)
1788	1,000
1789	10,000
1790	10,000
1795	20,000
1804	12,000
1807	14,000
1810	27,958
1820	30,000

Sumber: Pengumpulan dari Nota Hujungan 20

Anggaran penduduk di atas adalah berdasarkan kepada penilaian pentadbiran semasa serta lapuran dari akhbar. Ternyata Pulau Pinang telah berjaya menarik penduduk Melayu di sekitarnya untuk berhijrah ke pulau itu. Bangsa-bangsa lain seperti dari India, China, Burma dan Siam turut berhijrah ke sini.

Pertambahan penduduk yang pesat telah mempertingkatkan keupayaan perdagangan. Pelabuhan Pulau Pinang yang semakin maju. Berupaya menguasai pasaran bijih timah dan rempah-ratus dari kawasan sekitarnya. Hasil yang diperolehi dari usaha memajukan Pulau Pinang memberikan pulangan yang lumayan. Umpamanya, nilai sewaan tahunan pekan George Town berjumlah 120,000 Dollar Sepanyol, hasil rempah 500,000 Dollar dan harta benda bernilai 3,000,000 Dollar. Walaupun begitu masih banyak lagi hasil-hasil hutan yang belum diiterokai di Pulau Pinang.

"If to the amount be added, the company's property the whole may be justly valued at three million sterling, a sum which considering the island was a jungle with logs and wild monkeys of inhabitants 19 years ago....."<sup>21</sup>

Pelabuhan Pulau Pinang dalam sedikit masa sahaja telah berjaya menarik ramai pedagang-pedagang dari pantai timur Sumatera, bermula dari Acheh hingga ke Siak, iaitu Acheh, Panai, Asahan, Batu Bara, Serdang, Deli, Batu China, Langkat, Siak dan kawasan lain seperti Pedas, Bengkalis dan lain-lain. Demikian juga dengan pedagang dari Semenanjung Melayu yang datang dari kepulauan Malabar di utara hingga ke Terengganu di pantai timur serta

kepulauan Maluku di sebelah timur jauh. Mereka datang berdagang hasil mahsul tempatan seperti bijih timah, rempah-ratus, lada, hasil hutan dan binatang serta hasil laut. Secara tidak langsung Pulau Pinang telah dapat menguasai perdagangan di Selat Melaka yang bermula dari Teluk Benggala hingga kepulauan Riau di selatannya.

Sebagai pelabuhan bebas, Pulau Pinang tidak mendapat banyak hasil secara langsung dari perdagangan impot-ekspot. Namun kebebasan berdagang telah mempertingkatkan peranannya sebagai tempat pemasaran barang-barang pesisir pantai dan antarabangsa. Dari segi penanggungan perbelanjaan, jika berdasarkan kepada hasil percukaian semata mata didapati Pulau Pinang mengalami kerugian seperti yang ditunjukkan dalam Jadual 2 di bawah.

**Jadual 3.2: Data Hasil dan Perbelanjaan Antara Tahun 1792-1805**

TAHUN	HASIL	PERBELANJAAN
1792	\$ 23,000.00	\$ 150,000.00
1801	\$ 74,000.00	\$ 174,000.00
1805	\$116,000.00	\$334,000.00

**Sumber: SSFR (IOL), VOL. 9, Tanpa Folio**

Sumbangan percukaian hanya diperolehi dari pajakan candu, arak, perjudian, babi, pelbagai ternakan lain dan cukai perniagaan. Pulau Pinang tidak berupaya mencapai kemajuan secara mendadak dalam memainkan peranan sebagai sebuah pelabuhan bebas. Ia terpaksa bersaing dengan dasar monopolii

Belanda di Melaka dan di Jawa yang menyekat pengaliran hasil dari kawasan sekelilingnya untuk dipasarkan ke Pulau Pinang.<sup>22</sup>

Dari segi sumbangannya yang lain, Pelabuhan Pulau Pinang menyediakan pelbagai kemudahan kepada kapal dan perahu yang datang berdagang. Pedagang barat datang dengan kapal besar, pedagang China dengan Jong China, (Chinese Junks) manakala pedagang pesisir dari Semenanjung dan Sumatera Timur datang dengan Perahu Melayu (Malay Prahus). Antara barang dagangan mereka ialah:

".....a little over a million of which was Straits produce, the collective name for the beche de mer, beeswax, betelnut, birds nests, buffallo hides, camphor, cutch, dammer, dragon's blood, elephants teeth, fish maws, gold dust, pearlshell, rattans, sago, sharks fins, spices, sticklac, tobacco leaf, tortois, and Straits Sundries .....from the rivers and creeks of its Malaysian hinterland".<sup>23</sup>

Barangan utama yang lain ialah barangan makanan seperti beras, binatang ternakan dan telor serta sayur-sayuran. Manakala penjualan gajah tidak dijalankan di Pulau Pinang, sebaliknya dilakukan di negeri asal pengeluarnya. Bagi Province Wellesley penjualan gajah dilakukan di Sungai Perai, yang kemudiannya dibawa terus ke India atau ke pasaran yang lain.<sup>24</sup>

Jumlah kapal dagang dan perahu Melayu yang datang berdagang (selain milik EIC) dari Disember 1786 hingga Mei 1787 seperti ditunjukkan dalam Jadual 3 di bawah:<sup>25</sup>

**Jadual 3.3: Jumlah Kapal Dagang Berlabuh Dari Dis. 1786-Mei 1787**

NEGERI	JUMLAH
Pegu	
Mergui	
Acheh	17
Melaka	
Selatan India	16
Bengal	11
Canton dan Macao	7
Amerika	1
JUMLAH	42

Sumber: K.G. Tregonning, The British in Malaya, The First 40 Years 1786-1826, Tuscon, University of Arizona Press, 1965, hal. 10.

Jumlah ini terus bertambah sehingga Disember 1790, menjadi 104 buah.

Jumlah perahu yang datang pula ialah seratus buah sebulan pada tahun 1787, menjadi 1,836 buah pada tahun 1799 dan 3,328 buah pada tahun 1802. Semua ini membawa pulangan hasil kepada Pulau Pinang. Umpamanya, perahu Melayu telah membawa dagangan sejumlah \$ 185,395 dengan pecahannya seperti yang ditunjukan dalam Jadual 4 di bawah:<sup>26</sup>

**Jadual 3.4: Nilai Barang Oleh Perahu Melayu**

JENIS BARANGAN	NILAI
Bijih Timah	\$ 46,563.00
Beras	\$ 33,593.00
Sarang Burung	\$ 14,420.00
Lada	\$ 12,840.00
Habuk Emas	\$ 10,125.00
Rotan	\$ 9,667.00

Sumber: K.G. Tregonning, *Ibid*, hal. 119.

Barang barang di atas, sebahagian besarnya ditukarkan dengan barang dari India, Eropah dan China. Barang dari India yang menjadi tukaran ialah kain ela (piece of goods), candu, kain kapas, gandum, bawang dan ubi kentang. Barang dari Eropah pula terdiri daripada besi (iron ware), senapang, ubat bedil, kain bulu, kain kapas dan mesin. Bagi barang dari China pula terdiri daripada teh, sutera dan pinggan mangkok. Hasil dari pertukaran barang-barang ini telah membawa kepada pertambahan pendapatan hampir separuh dari keseluruhan hasil Pulau Pinang.

Dengan berlakunya perkembangan di atas, pembukaan Pelabuhan Pulau Pinang telah memberi kesan kepada rangkaian perdagangan di darat. Selama ini banyak berlaku pertukaran barang di pedalaman. Barang dari pedalaman Kedah, Patani-Kelantan, Singgora dan juga Ligor bertukar ganti dalam pengedaran mereka sebelum di bawa ke pelabuhan-pelabuhan negeri masing-masing. Bagaimanapun kini hampir keseluruhannya

tertumpu ke Pulau Pinang. Perkembangan baru ini telah menggugat pelabuhan-pelabuhan lain yang berperanan sebagai pengumpul barang dari kawasan pedalaman dan kawasan pesisir pantai. Pihak yang banyak menerima kesan, selain dari Kedah ialah Ligor. Banyak dari petempatan-petempatan di sebelah utara pantai barat, yang dahulunya berdagang dengan Ligor kini telah beralih ke Pulau Pinang.

Pembukaan Pulau Pinang bukan sahaja memberi kesan kepada perdagangan, malah memberi kesan juga kepada sistem politik dan pemerintahan tempatan dan juga Siam. Pulau Pinang sahaja dirasakan tidak mencukupi untuk tujuan perdagangan, pertahanan dan keselamatan. Oleh itu pihak British bercadang untuk menapak dan berkembang di tanah besar Semenanjung Melayu.

### **3.3 PERLUASAN WILAYAH BRITISH DAN PEMBENTUKAN SEMPADAN DI BUMI KEDAH (1800-1831)**

Seperti yang telah dijelaskan di atas, Pulau Pinang berupaya menarik perdagangan di perairan Selat Melaka. Bagaimanapun dari segi keseluruhan keselamatan, Pulau Pinang masih terdedah kepada serangan dari laut dan juga dari kawasan hadapan (frontier) di tanah besar. Pengalaman pada tahun 1791, mengingatkan F. Light akan kepentingannya mendapatkan kawasan hadapan. Namun kerana hubungan yang agak tegang selepas perang, beliau tidak mengemukakan idea ini kepada Kedah.

Kematian F. Light pada 21 Oktober 1794 dan kemangkatan Sultan Abdullah pada tahun 1797 telah merintis penyelesaian. Dari segi perlindungan keselamatan dagangan, pedagang-pedagang di Pulau Pinang telah

mendesak Residen baru Kapten Forbes Ross Macdonald untuk mendapatkan sebidang tanah di hadapan Pulau Pinang. Namun beliau tidak bertindak sehingga ke datangan Leftenan Gabenor yang pertama Kapten Sir George Leith pada awal tahun 1800. Pemerintah Kedah pula pada masa itu Yang Di Pertuan Muda Perlis dan Kedah, Sultan Dhiyauddin Mukarram Shah II (1797-1804) sebagai Pemangku Sultan. Hubungan awal antara kedua mereka tidak begitu rapat. Pemangku Sultan kecewa dengan bayaran sagu hati yang tidak berketentuan. Sementara itu Pulau Pinang pula marahkan tindakan Kedah menyekat jalan laluan Sungai Muda dari pendalamannya Hulu Muda untuk sampai ke Pulau Pinang.<sup>27</sup> Namun kerana kepentingan perdagangan dan keselamatan, Leftenan Gabenor George Leith kemudiannya telah menghantar Kapten Forbess untuk mengadakan perundingan dan perjanjian. Akhirnya termeterilah perjanjian "Perdamaian, Persahabatan dan Bersekutu" yang ditandatangani pada 6 Jun 1800. Artikel 2 telah menggariskan kawasan yang "diserahkan" oleh Kedah kepada EIC:<sup>28</sup>

"His Highness the Yang de per Tuan agrees to give the English Company, for ever, all that part of the sea coast that is between Quala Krean and the river side of Quala Mooda, and measuring inland from the sea side 60 orlong: the whole length above mentioned to be measured by people appointed by Iang de per Tuan and Company's people. The Company are to protect this coast from all enemies, robbers and pirates that may attack it by sea, from the north to south."

Pendudukan British di Province Wellesley menjadi titik tolak awal kepada penerusan seterusnya kepada pendudukan di Tanah Melayu. Persempadan yang diperkenalkan iaitu dari tebing ke tebing sungai dan satu garisan lurus adalah perkara baru bagi kerajaan Melayu tradisional. Dari segi

kepentingan pendudukan ini dijelaskan oleh George Leith seperti berikut:<sup>29</sup>

"We certainly cannot expect to derive any immediate revenue from the possession of the opposite coast -but it give us the entire command of harbour, which we never possessed before, and it strengthens our position the same time . It has hitherto served as a respectable for every description of vagabonds who injured our revenue and trade as pirates and smugglers. We should now be able to rear cattle, for which we have hitherto been depend, and in failure should it be deemed an object which may be cultivated".

Pendudukan ke atas kawasan seluas 84 batu persegi dengan mengambil kira panjang pantai dari tebing kiri Sungai Muda di utara ke tebing kanan Sungai Kerian di selatan dan lebarnya forlong (lebih kurang 2.7 batu) memberikan satu lagi pertambahan kawasan kepada EIC. Dengan keadaan tanahnya yang pamah di tepi pantai dan diairi oleh Sungai Muda, Perai, Juru, Jejawi, Tengah, dan Sungai Kerian memberikan satu kawasan lembah yang luas. Kawasan ini tidak mempunyai tanah tinggi. Semua hulu sungainya berada di luar dari kawasan tersebut termasuk Sungai Perai dan Sungai Juru. Pada peringkat ini hanya hasil hasil hutan seperti kayu-kayan dan rotan sahaja memenuhi kawasan ini. Hasil lain ialah nibong dan nipah. (lihat peta/gambarajah).

Dari segi penduduk, seperti Pulau Pinang, kawasan di sini juga telah didiami oleh orang-orang Melayu. Mereka tinggal di tepi-tepi laut dan lembah-lembah sungai. Pembukaan Province Wellesley telah menarik ramai orang Kedah berhijrah ke sini, terutama kepada mereka yang ingin bergiat dalam bidang pertanian. Kebanyakan mereka bertumpu di Lembah Muda,

Prai dan Kerian. Pada tahun 1810 dianggarkan seramai 3,692 orang di sini dan kemudian telah meningkat kepada 5,000 orang pada tahun 1815. Pada tahun 1821 jumlah penduduk di Province Wellesley dianggarkan lebih kurang 6,000 orang.<sup>30</sup>

Penyerahan Province Wellesley kepada British telah menyebabkan hubungan Kedah dengan Siam, semakin tegang. Siam tidak henti-henti membuat tuntutan daripada Kedah untuk membantunya dalam menangani masalahnya dengan Burma dan juga Patani.<sup>31</sup> Wakil Siam di selatan iaitu Raja Ligor berhasrat untuk menundukkan Kedah atas nama Raja Besar Siam. Walau bagaimanapun keadaan ini dapat dikendurkan kerana bakal Sultan Kedah telah mengadap dan membuat sembah hormat ke Bangkok. Akhirnya Sultan Ahmad Tajuddin Halim Shah II (1804-1845) sultan yang ke 21 telah di iktiraf sebagai sultan dengan mengambil alih jawatan Pemangku Sultan dari bapa saudaranya Yang Di Pertuan Muda Perlis dan Kedah. Peranan yang dimainkan oleh baginda seterusnya dalam memenuhi kehendak Siam telah dapat menyelamatkan Kedah dari diserang oleh Raja Ligor. Keadaan begini berterusan lagi apabila Raja Ligor mencemburui pangkat yang dianugerahkan oleh Raja Siam kepada Sultan Kedah yang menyamai kedudukannya sebagai wakil di selatan. Dalam masa yang sama, kemajuan Pulau Pinang telah banyak menarik hasil-hasil dari kawasan sebelah utara dari Kedah yang dahulunya pergi ke Ligor. Ini telah memberi satu lagi tamparan hebat kepadanya yang kemudian nanti telah mengubah corak sejarah di sini

seterusnya.<sup>32</sup>

Sungguh pun telah dilantik sebagai sultan, Sultan Ahmad masih tidak terlepas dari masalah dalaman dengan keluarga dan kerabatnya. Perkembangan di selatan Kedah memberi tarikan kepada baginda untuk berpindah ke sana. Baginda menduduki kembali kota yang dibina semula oleh Raja Muda Tunku Ibrahim di Kuala Muda. Dengan menduduki Kuala Muda ini memudahkan bagi baginda menguasai laluan perdagangan. Dengan berbuat demikian harga barang dari pedalaman Muda dan juga Patani menjadi lebih mahal apabila sampai di Pulau Pinang. Dalam keadaan yang sama, Pulau Pinang juga berhadapan dengan ugutan Siam yang sering mempertikaikan pendudukan tersebut tanpa restu mereka. Sebagai jalan keluar, British berkehendakan satu ketetapan hak milik ke atas jarak 60 orlong atau pun jika boleh mahukan satu kawasan tambahan baru yang jelas dan kekal..<sup>33</sup>

Satu cadangan untuk mendapatkan kawasan baru bagi memperkuatkan lagi kedudukan Pulau Pinang telah dilaporkan oleh Leftenan Gabenor R.J. Faquhar pada 18 September 1805. Antara lain beliau mengesyorkan supaya Pulau Pinang dijadikan Pengkalan dan Depoh Tentera Laut sebagaimana yang telah dirancangkan. Menurut beliau kawasan baru tersebut diperlukan bagi menjamin perbekalan barang terutamanya bahan makanan dari Kedah dapat berjalan dengan lancar, menjamin pertambahan penduduk dan pengawalan terhadap pasaran buruh serta pihak EIC tidak terlibat dengan sebarang kancah perebutan kuasa antara kerabat Kedah.

Cadangan beliau lagi:


"The portion of territory above alluded to would be bounded to the northward by the ridge of Gunung Jerai Hill from Tanjung Jaga on the west (direction ?) the lake to the mountain on the east and thence by a line east and west to the confines Tungano (Trengganu ?). To the south the defined boundaries would be the river Carrian to the river Temonggong (Temengor?) to the mountain and thence an eastnorthwest line to the confines of Tungano. To the east the boundaries of Tungano to the west the sea including all island lying south of and west line from Tanjung Jaga and then to the northward of a west south west (turn ?) from the southern entrance or Carrian".<sup>34</sup> (Lihat sama peta lakar)

EIC di Pulau Pinang telah bersedia untuk membeli kawasan tersebut, sekiranya Sultan Kedah tidak mahu menyerahkan kawasan itu kepada mereka dengan bayaran pampasan yang ditawarkan. Lakaran tersebut juga telah mendedahkan bahawa di Gunung Jerai dan di kawasan pedalaman yang menjadi punca-punca sungai di Kedah banyak mengandungi bijih timah selain dari hasil hutan dan tanahnya yang subur untuk pertanian.<sup>35</sup> Lakaran ini juga memberi maklumat keluasan kawasan yang dicadangkan iaitu:

- a. Tanjung Jaga kira kira 7 league dari Fort Cornwallis. *b. ga*
- b. Sungai Kerian kira kira 5 league dari tempat yang sama.
- c. Kedudukan gunung di sempadan timur pada anggaran 10 ke 12 league.

Oleh itu jumlah kawasan yang di pinta lebih kurang 100 ke 140 league. Jika mengikut perkiraan kasar satu league bersamaan 3 batu, maka keluasan yang diminta ialah 300 ke 420 batu persegi yang membawa keluasan

### 3.4. Gunnung Jerai dan Province Wellesley (Kawasan Tuntutan EIC)



Sumber: SSFR (RNLS) G1 f.39-41.

4 ke 5 kali ganda dari kawasan asal Province Wellesley.

EIC apabila mengetahui bahawa Siam menunggu masa sahaja untuk menakluki Kedah dan sedar bahawa Kedah berada dalam keadaan tertekan, telah mengambil peluang ini untuk mengajukan permohonan kepada Sultan Kedah pada 6 Oktober 1818 (5 Zulhijjah 1233) dengan menggariskan kawasan yang dikehendakinya:<sup>36</sup>

"The Governor of Penang request of his friend the Raja of Kedah to extend the company territory on the coast opposite Penang as far as to 10 orlongs to morthward of Quala Murbow (Merbuk ?) extending 60 orlongs in depth the same as former territory."

Dari kenyataan di atas, didapati sempadan tepi laut hampir sama dengan cadangan pada tahun 1805 tetapi keluasan sahaja disempitkan kepada satu league. Bagaimanapun, matlamatnya tetap sama; iaitu satu kawasan baru yang menjamin pemilikan kawasan pertanian, pengawasan sumber tenaga manusia, hasil mahsul dan pengawalan kepada lebih banyak lagi jalan laluan dari pedalaman Kedah. Bagaimanapun usaha ini telah ditolak oleh sultan dengan alasan kawasan terbabit adalah pusat pemerintahannya, telah dibahagi-bahagikan kepada waris-warisnya dan tidak dapat membuat perundingan dengan pembesar-pembesarnya yang kini sedang berada di luar negeri. (Pada masa ini Kedah sedang memerangi Perak).

EIC amat kecewa dengan penolakan ini kerana mereka semakin tersepit apabila Belanda kembali semula ke Semenanjung (Melaka) pada tahun

1818 dengan dasar monopolinya. Banyak dari hasil yang dahulunya datang ke Pulau Pinang terpaksa disalurkan kembali ke Melaka, umpamanya hasil mahsul dari Perak dan Selangor. Keadaan lebih genting lagi apabila Kedah menyerang Perak pada tahun 1816. Peperangan ini berlarutan sehingga tahun 1818. Banyak dari hasil mahsul Perak tidak sampai ke Pulau Pinang. Ura-ura Siam untuk menyerang Kedah semakin jelas. Segala persiapan di sebelah utara (di Sungai Trang) telah memberikan petanda awal. Dengan itu EIC tidak ada jalan lain, kecuali mengugut Sultan Kedah dengan memberi amaran akan menarik balik saguhati \$10,000 setahun sekiranya kebenaran tidak diberi kepada EIC untuk mengawal Kuala Muda. Surat amaran bertarikh 11 Julai 1819 telah dibalas oleh Sultan Kedah pada 8 Ogos dengan menegaskan bahawa antara tambahan kawasan dengan bayaran sagu hati adalah tidak berkaitan. Lagi pun kawasan yang diminta bukanlah merupakan wilayah atau jajahan Kedah tetapi adalah pusat pemerintahannya.<sup>37</sup> Persoalan ini berterusan tanpa kesudahan antara tuntutan dengan ugutan sehingga Kedah ditakluki Siam Ligor pada 12 November 1821.

Satu lagi tempat yang menjadi permasalahan kepada EIC akibat tidak ada ketentuan garis sempadan ialah Kota. Kota terletak di tepi Sungai Perai merupakan petempatan Tunku Sulaiman adik kepada Sultan Kedah. Beliau berpindah dan membuka Kota kerana kemajuan Pulau Pinang, perkembangan di Province Wellesley dan juga mahu melarikan diri dari kancalah perbalahan kekeluargaan dalam perebutan tahta di Kedah. Oleh kerana

kedudukan Kota berada di luar kawasan 60 orlong, maka tidaklah dapat bagi EIC melaksanakan peraturan mereka di sini. Apa yang menjadi persoalan ialah kedudukan kampung-kampung di sekitarnya seperti Kampung Sintuk dan Kampung Tanjung Putus. EIC mendakwa kampung tersebut berada dalam lingkungan 60 orlong, tetapi dinafikan oleh Tunku Sulaiman.

Dari segi penduduk mereka memberi kesetiaan kepada Kota dan pada masa yang sama mengikut peraturan di Province Wellesley. Masalah yang sering timbul ialah apabila berlaku kekacauan atau keganasan, pihak EIC tidak dapat melaksanakan peraturan mereka, kerana penduduk yang terlibat melarikan diri ke Kota untuk perlindungan. Perbincangan seterusnya akan memperlihatkan peranan dan kepentingan Kota.<sup>38</sup>

### **3.4 KAEDAH DITAKLUKI SIAM**

Seperti yang telah dijelaskan di atas Siam berjaya menakluk Kedah melalui usaha Raja Ligor pada 12 November 1821. Ketika Kedah diserang, Sultan, yang berada di Pulau Tiga, di Hulu Sungai Merbuk, telah melarikan diri ke Kota dan kemudiannya ke Pulau Pinang. Penaklukan ini meletakkan Kedah di bawah jajahan Ligor sekali gus di bawah jajahan Siam. Sultan Kedah berkelana di Pulau Pinang dan kadang-kala ke Province Wellesley. Sebilangan besar rakyat Kedah mengikut jejak sultan berhijrah ke Pulau Pinang dan Province Wellesley.<sup>39</sup>

Raja Ligor telah menempatkan dua orang anaknya memerintah Kedah dan kawasan Perlis serta Setol. Sejak Kedah tewas, EIC terpaksa

berurusan dengan Raja Ligor atau wakilnya. Ini disebabkan Raja Ligor telah mempastikan supaya penduduk, hasil mahsul, jalan laluan dan perdagangan di Kedah berada dalam genggamannya. Ramai penduduk yang telah ditawan dan ditangkap dibawa ke Ligor dan Bangkok untuk dijadikan hamba. Hasil mahsul tidak lagi dibawa ke Pulau Pinang tetapi ke Ligor untuk pasaran di Bangkok. Kemudahan jalan laluan untuk membawa hasil ke Pulau Pinang semakin diperketatkan dengan Raja Ligor melantik Pesuruhjayanya bagi mentadbir di Kuala Muda, Kuala Kerian dan Kuala Kurau. Hal ini telah banyak memberi kerugian kepada perdagangan dan masalah kepada pentadbiran di Pulau Pinang.<sup>40</sup>

Sultan Kedah mempersalahkan EIC kerana tidak membantunya dalam menghadapi serangan Siam. Baginda menuntut supaya dikembalikan semula takhtanya, di samping itu baginda telah berusaha menyerang Ligor pada tahun 1822. Ramai pedagang dan pegawai EIC bersimpati dan memihak kepada Kedah. Mereka mendesak EIC yang mempunyai tanggungjawab moral, mengembalikan semula keamanan dan takhta Kerajaan Kedah. EIC akhirnya bersetuju berunding dengan Siam. John Bowring telah dihantar ke Bangkok pada tahun 1822/23 untuk berunding, tetapi gagal. Kapten Henry Burney pula dihantar kemudiannya pada tahun 1825/26 untuk mengembalikan takhta Sultan Kedah dan mengadakan persahabatan perdagangan dengan Siam di samping meminta Siam membantu British dalam perperangan dengan Burma atau sekurang kurangnya tidak campur tangan membantu Burma.<sup>41</sup>

Kapten Henry Burney gagal dalam "missi" utama untuk mengembalikan takhta Sultan Kedah tetapi berjaya dalam mendapatkan hubungan dagangan dan pengiktirafan pendudukan ke atas Pulau Pinang. Pengiktirafan Siam di atas pendudukan mereka di Pulau Pinang telah memberi ruang kepada EIC membuka semula persoalan sempadan. Ia bersandarkan kepada Artikel 3 Perjanjian Burney bertarikh 20 Jun 1826 yang berbunyi:

"In places and countries belonging to the Siamese and English, lying near their mutual borders, whether to the east, west, north or south, if the English entertain a doubt as to any boundary that has not been ascertained, the chief on the side from frontier posts to go and inquire from the nearest Siamese chief, who shall depute some of his officers and people from his frontier post to go with the men belonging to the English chief, and point out, and settle the mutual boundaries, so that they may be ascertained on both sides in a friendly manner. If a Siamese chief entertain a doubt as to any boundary that has not been ascertained, the chief on the side of Siamese must posts, to go and inquire from the nearest English chief, and point out and settle the mutual boundaries, so that they may be ascertained on both sides in a friendly manner"<sup>42</sup>

Interpretasi perjanjian di atas jelas dan mudah, tetapi persoalannya tidak semudah itu untuk membawa Siam ke meja perundingan. Pihak EIC pula suka mengambil kesempatan menambah kawasan dan bukannya memperbetulkan kedudukan sempadan sebagaimana yang digariskan oleh perjanjian tahun 1800.

Usaha penentuan ketetapan sempadan bermula dengan tindakan Kapten James Low (Penguasa di Province Wellesley selepas A. D. Maingy) menduduki Bukit Tunggal dekat Sungai Kedah. Kedudukan ini sebenarnya

telah terkeluar dari garis 60 orlong. Alasan yang diberikannya untuk menduduki kawasan itu adalah untuk menjamin keselamatan. Bagaimanapun tujuan sebenar ialah untuk menjaga laluan di Sungai Kerian, supaya berada dalam tangan mereka. Ini disebabkan hasil-mahsul dari kawasan pedalaman di Selama, Ijok, Serdang, Bagan Samak dan Parit Buntar akan melalui sungai ini. Daerah daerah di atas kaya dengan hasil galian dan hutannya.<sup>43</sup>

Langkah seterusnya adalah untuk menentukan kedudukan jarak sebenar sempadan di atas bumi. Dalam perjanjian ini, permulaan sempadan bagi jarak 60 orlong tidak ditetapkan dari mana bermula (sama ada mengikut paras air pasang atau paras air surut). Ini boleh menimbulkan lebih dari satu interpretasi. Selaku pihak yang selalu mahu mengaut keuntungan, John Anderson telah mentafsirkan sebagai semasa air sedang pasang penuh iaitu pada gigi air yang teratas sekali. Apabila penyukatan dibuat, penandaan mesti dilakukan pada setiap jarak setengah batu. Sementara itu J. Low pula mahukan penyukatan dan penandaan sempadan dibuat pada tanda-tanda kekal seperti sungai, bukit dan banjaran. Alasan beliau kerana keadaan muka bumi di kawasan tersebut yang berhutan tebal, bertanah tinggi dan berpaya menyukarkan laluan tugas. Beliau juga memberi alasan perbelanjaan yang tinggi dalam anggaran \$18,000.<sup>44</sup>

Bagi membuka ruang, Robert Fullerton telah menghantar surat kepada Raja Ligor untuk merundingkan tentang perkara di atas. Raja Ligor mempertikaikan rancangan ini, malahan telah menghantar pegawainya

bersama-sama salinan pelan untuk menanyakan maksud sebenar penandaan sempadan yang dicadangkan. Dari peristiwa ini, bermulalah satu proses penetapan sempadan di negeri Melayu iaitu sempadan kerajaan Kedah dengan Province Wellesley, yang dikendalikan oleh pihak luar, iaitu British dan Siam. Tunku Sulaiman di Kota telah diheret bersama dalam perundingan bagi tujuan mempengaruhi Raja Ligor. Dalam usaha menggariskan sempadan, mereka juga berminat memasukkan Kota dan perkampungan di persekitarannya ke dalam Province Wellesley.<sup>45</sup>

Kegagalan mendapatkan sokongan Tunku Sulaiman, membuatkan J. Low beraleh terus kepada anak Raja Ligor. Beliau mencadangkan sempadan baru seperti berikut:<sup>46</sup>

"Dari sungai Muda melalui sungai Kreik ke Sungai Perai dan menghilir sampai ke Sungai Sintuk terus ke Bukit Mertajam dengan mengikut permatang yang rendah menuju ke Bukit Tunggal di Sungai Kerian".

Sultan Kedah telah dijadikan alasan oleh Anak Raja Ligor untuk tidak menerima cadangan ini. Selagi Sultan Kedah berada di Pulau Pinang dan bebas ke Province Wellesley, pintu rundingan terus tertutup. Dalam hal ini nampaknya Siam berupaya mempertahankan kekuasaannya dalam menangani permasalahan di atas. Perang surat-menurut berterusan, bagaimanapun penyelesaian masih belum tercapai. Dalam pada itu J. Low berada dalam keadaan tertekan kerana Sultan Kedah menjadikan Province Wellesley sebagai tapak dan laluan untuk menyerang Siam. Keadaan menjadi lebih berat lagi

apabila ramai rakyat Province Wellesley dan Pulau Pinang turut melibatkan diri.

Pemberontakan yang bermula pada 20 April 1831 telah memberhentikan surat-menurut perundangan. Serangan mengejut Tunku Kudin ke atas pertahanan Siam di Kuala Muda menyebabkan Anak Raja Ligor melarikan diri ke pedalaman.<sup>47</sup> Semasa pemberontakan inilah British memainkan peranan aktif dalam membantu Siam. Seluruh pantai Kedah di kepong bagi menyekat bantuan sampai ke tangan pemberontak. Akhirnya pada bulan Oktober 1831, Siam dapat kembali menawan Kedah di Kota Kuala Muda.<sup>48</sup>

Apabila Kedah ditawan kembali, Robert Ibetson dengan segera pergi ke Kedah untuk berjumpa Raja Ligor bagi membincang dan mendesak menandatangani perjanjian sempadan. Peluang ini disegerakan oleh British kerana mereka telah menghulur banyak bantuan kepada Raja Ligor, sehingga berjaya semula menawan Kedah. Hasilnya termeterilah satu perjanjian pada 2 November 1831 yang antara lain telah menetapkan sempadan baru antara wilayah EIC dengan Kedah. Perjanjian ini telah ditandatangani oleh R. Ibetson, Chao Phya Ligor dan J. Low.<sup>49</sup> Lokasi-lokasi yang telah dijadikan sempadan seperti yang dijelaskan di bawah:

"Dari Semetul yang terletak di tebing selatan Sungai Muda ikut jalan darat menuju ke Sungai Perai satu tempat 10 orlong ke timur ke Sungai Dua Hulu, kemudian mengalir di tengah tengah Sungai Perai ke Kuala Sungai Sintuk dan mudik Sungai Sintuk dalam arah lurus ke Bukit Mertajam. Kemudian dari

Bukit Mertajam ikut sepanjang banjaran/permataang bukit, Bukit Berotor ke satu tempat di tebing Sungai Kerian dalam 5 orlong ke atas dan timur dari Bukit Tunggal dan adalah dipersetujui tanda (pancang) samada batu atau bata akan ditanda (tanam), satu di sempadan Semetul dan lainnya di sempadan Sungai Perai dan yang ketiganya di sempadan Sungai Krian"<sup>50</sup>

Perjanjian ini telah memperlihatkan satu kejayaan kepada R. Obetson dan EIC. Dari segi keluasan, EIC memperolehi kawasan seluas kira-kira 286 batu persegi berbanding dengan sebelumnya hanya seluas kira-kira 84 batu persegi sahaja. Di samping itu mereka telah memperkenalkan satu sistem sempadan yang bergaris lurus, melalui tengah-tengah sungai di samping menggunakan tanda kekal seperti sungai, bukit dan banjaran sebagaimana sempadan.<sup>51</sup>

Dengan termeterainya perjanjian ini bertambah erat lagi hubungan antara Raja Ligor dengan R. Ibetson. Ini telah melicinkan peroses penandaan sempadan apabila J. Low dapat menyempurnakannya bersama-sama Along Kru Najuk Nu, wakil Raja Ligor pada 3 April 1832. Dengan berlakunya perkembangan di atas tercapailah hasrat EIC yang telah menunggu begitu lama bagi mendapatkan satu sempadan, yang sesuai untuk kepentingan ekonomi, perdagangan dan pertahanan mereka.<sup>52</sup>

Perjanjian tersebut memperlihatkan sikap tolak ansur British-Siam di negeri Melayu (Kedah). Dengan berlakunya hubungan sedemikian menyebabkan Sultan Kedah, selain dari kehilangan takhta kerajaan dan kawasan seluas 160 batu persegi buat selama lamanya. Baginda juga

*Baginda juga*

/ telah dinafikan haknya untuk tinggal bebas di Pulau Pinang, Province Wellesley dan juga Kedah. Baginda terpaksa hidup dalam buangan di Melaka atas paksaan British dan tekanan Siam. Peristiwa ini merupakan satu perkara baru dalam sistem politik kerajaan Melayu (Kedah) bilamana kepentingan atau hak sendiri telah ditentukan oleh pihak lain.

Hubungan baik British-Siam telah membolehkan perdagangan berjalan dengan lancar. Sebelum ini Pulau Pinang bergantung kepada Kedah dari segi keperluan hasil pertanian dan penternakan, tetapi kini Kedah pula yang terpaksa bergantung barang makanan dari Pulau Pinang, terutamanya beras. Sebagai balasan hasil mahsul hutan dan galian dari pedalaman Kedah tidak semuanya diborong ke Ligor, tetapi sebahagian daripadanya dipasarkan ke Pulau Pinang. Laluan di Sungai Muda berjalan lancar dan Kota tidak lagi menimbulkan persoalan.<sup>53</sup>

Raja Ligor amat mengharapkan bantuan dari EIC dalam mengawasi sultan, kerabat dan penduduk Melayu di wilayah British mahupun di Kedah. Ini kerana beliau tidak berupaya untuk menempatkan tentera yang ramai di Kedah. Dengan sebab itu hubungan yang baik dengan Britsh sangat-sangat diperlukan.<sup>54</sup>

Kejayaan perjanjian dan penandaan batu sempadan ini telah memperlihatkan satu ciri baru kepada persempadanan kawasan kerajaan Melayu. Ia juga telah melicinkan hubungan perdagangan dan diplomatik antara Bitish dengan Siam di negeri Melayu. Bagaimanapun oleh kerana asas

perhubungan yang tidak kukuh yang berlandaskan kepada kepentingan masing-masing, tanpa mengambil kira pihak ketiga iaitu kerajaan Melayu yang terlibat, menjadikan persempadanan ini hanya bertahan untuk jangka masa yang singkat sahaja.

### **3.5 PENDUDUKAN KEDAH KE ATAS DAERAH SELATAN KRIAN DAN KESANNYA KEPADA PEMBENTUKAN SEMPADAN (1843-1869)**

Penghijrahan Sultan Kedah dan keluarga terdekatnya ke Melaka tidak menjaminkan keamanan yang diharap-harapkan. Baginda walaupun dalam buangan, sentiasa berazam untuk merampas kembali takhtanya. Beberapa percubaan kecil telah dilakukan oleh pengikut-pengikut baginda, terutamanya oleh waris dan kerabat terdekat. EIC kurang senang dengan keadaan ini, tambahan lagi ia perlu menjaga kepercayaan yang telah diberikan oleh Siam kepadanya.

Semasa di Melaka baginda selalu menghubungi rakyatnya di Kedah. Sebagai satu helah baginda memohon untuk berpindah ke Deli. Pihak British meluluskan permohonan tersebut dengan syarat baginda mesti bayar terus dari Melaka. Baginda pula mahukan semua keluarga terdekatnya ikut sama, yang kebanyakan dari mereka masih tinggal di Pulau Pinang. Kegagalan pihak British memenuhi kemahuannya menyebabkan baginda memilih untuk singgah di Bruas, Perak. Keadaan ini menggusarkan British kerana jika dibiarkan akan dipertikaikan oleh Raja Ligor. Apabila di suruh keluar, baginda tetap berkeras sehingga akhirnya terjadi satu perperangan antara British yang

dipimpin oleh Kapten Mc Crea dengan Sultan Kedah. Dalam perperangan tersebut Sultan Kedah mendapat bantuan daripada Raja Muda Perak. Walau pun tewas dan dipaksa balik ke Melaka, melalui Pulau Pinang baginda telah berjaya mengatur gerak kepada pembesar-pembesar Kedah yang masih berada di sana.<sup>55</sup>

Usaha baginda telah disambung oleh Tunku Mohammad Saad bersama kerabat lain seperti Tunku Mohammad Taib, Tunku Abdullah dan juga Penghulu Mohd Ali dari Pulau Langkawi. Satu serangan serentak telah dilancarkan pada Ogos 1838. Tentera Siam telah dapat dikeluarkan dari Kedah dan dihalau hingga ke Singgora. Demikian juga dengan petempatan Siam di kawasan lain seperti di Perlis, Setol dan Trang juga turut ditewaskan. Pemberontakan ini turut sama disertai oleh orang-orang Melayu dari Perak, Patani, Kelantan dan juga Terengganu. Penentangan dari banyak penjuru menyebabkan Siam tewas. Kekalahan ini menyebabkan Raja Ligor yang kebetulannya berada di Bangkok dipersalahkan. Raja Ligor pulang dan mengatur gerakan untuk menawan kembali Kedah dan juga Patani yang turut sama memberontak. Raja Ligor pada peringkat awalnya gagal. Bagaimanapun dengan bantuan dari Bangkok dan orang-orang China, Singgora dapat ditawan kembali dan akhirnya Raja Ligor berjaya masuk semula ke Kedah pada Mac 1839. Dalam hal ini British telah membuat sekatan ke seluruh pantai Kedah dan mengisyiharkan "pemberontak" sebagai lanun. Sekatan British telah memutuskan segala bentuk bantuan untuk sampai kepada pemberontak di

darat. Ini lah yang membawa kejayaan kepada Siam setelah pemberontak tertekan dari darat dan tidak mendapat bantuan dari laut.

Akibat daripada pemberontakan ini, Tunku Abdullah telah ditangkap oleh British dan dihantar ke Melaka. Tunku Mohammad Saad dipenjara di Calcutta. Penghulu Mohd Ali lari ke Sumatera dan yang menerima padah paling teruk ialah rakyat jelata Kedah. Selain dari ditawan mereka juga dijadikan mangsa penyiksaan. Ramai yang melarikan diri keluar dari Kedah ke kawasan yang lebih selamat seperti Province Wellesley dan kawasan-kawasan lain yang lebih jauh. Pembantu Kedah dari luar iaitu Patani turut terhukum apabila mereka turut gagal dalam pemberontakan tersebut. Kesannya turut juga dirasai oleh Kelantan dan Terengganu.<sup>56</sup>

Kematian Raja Ligor mengurangkan halangan Sultan Kedah untuk mendapatkan kembali takhtanya. Di bawah pemerintahan baru, pihak Siam menyedari bahawa tekanan yang berterusan ke atas Kedah akan memaksa lebih banyak lagi pemberontakan akan berlaku di Kedah dan di wilayah-wilayah Melayu yang dikuasainya. Oleh yang demikian pihak Siam sedia berunding dengan Sultan Kedah, yang akhirnya memberi peluang kepada Sultan Ahmad Tajuddin kembali ke takhtanya di Anak Bukit pada pertengahan tahun 1842.

Walaupun begitu baginda kerajaan Kedah telah dipecah-pecahan kepada kerajaan Setol, Perlis, Kubang Pasu dan Kedah sendiri. Setiap kerajaan mempunyai pemerintahnya sendiri yang tidak tertakluk kepada

baginda lagi. Hal ini walaupun dipersetujuinya sebagai sebahagian dari syarat untuk kembali, tetapi telah mencabar kewibawan baginda yang dianggap "the willy character of this obstinate old man" dan "over noted for his obstinacy when it was most to his disadvantage".<sup>57</sup> Baginda tidak lama tinggal di Anak Bukit dan telah berpindah semula ke Kota Kuala Muda. Di Kuala Muda baginda membuat pemerhatian dan menaruh minat yang mendalam ke kawasan selatan Sungai Kerian.

Lembah Kerian dan Lembah Muda terkenal dengan kesuburan tanahnya telah berjaya menarik ramai penduduk. Sultan Ahmad yang menyedari bahawa bahagian utara negerinya telah mengalami kemerosotan dengan penduduk dan pemerintahannya yang telah terbahagi tiga, telah kembali menduduki Kota Kuala Muda. Dalam masa yang sama Lembah Kerian mendapat perhatian dari baginda. Sebahagian daripada penduduk di sini datang dari Kedah. Mereka adalah rakyat baginda juga. Pada tahun 1842 baginda akhirnya menduduki Lembah Kerian, kerana menganggap lembah itu adalah sebahagian daripada wilayah Kedah.<sup>58</sup>

Tindakan baginda menduduki selatan Lembah Kerian memeranjatkan Perak dan mengecewakan British. British segera bertindak memaksa Sultan Ahmad keluar dari selatan Kerian dan menggantung wang ganjarannya. British berbuat demikian kerana terikat kepada perjanjian persahabatan 1826 dengan Perak. Sultan Kedah pulang semula ke Alor Setar pada akhir tahun 1843, tetapi tidak melepaskan pendudukannya ke atas Kerian.

Tugas besar baginda di Alor Setar ialah membaikpulih kawasan yang musnah akibat perang. Kota yang dibina oleh Sultan Mohammad Jiwa pada tahun 1735 perlu dibangunkan semula untuk menarik kembali penduduk yang telah melarikan diri ke pedalaman atau berhijrah keluar. Usaha baginda tidak berjaya kerana Kedah dilanda wabak taun dan baginda sendiri mangkat pada 3 Januari 1845.

Lembah Kerian selain daripada kesuburan tanahnya, ia menjadi rebutan kerana dua batang sungai utama iaitu Sungai Muda dan Sungai Kerian adalah menjadi nadi kepada laluan ke pedalaman Kedah, Patani dan juga ke Hulu Perak. Kedua-dua hulu sungai ini berada di banjaran yang memisahkan antara ketiga-tiga hulu negeri tersebut yang terkenal dengan banyaknya hasil galian bijih, hasil hutan dan gajahnya. Pendudukan kawasan ini bererti dapat menguasai kawasan pertanian dan laluan yang membawa hasil dari pedalaman di samping tenaga manusia.

Bagi British di Pulau Pinang, tindakan Sultan Ahmad telah menyebabkan seluruh sempadan Province Wellesley terkepong oleh pemerintahan Kedah. Manakala kedua-dua laluan di utara dan di selatan telah jatuh kembali ketangan Kedah. British amat kuatir akan sekatan terhadap pengeluaran hasil dari pedalaman untuk sampai ke Pulau Pinang. Bagi mereka selagi Kerian berada di bawah Perak, masalah tidak timbul kerana pemerintah Perak mudah dibawa berunding.<sup>59</sup> Satu lagi sebab British terkejut dengan tindakan Sultan Kedah kerana mereka juga berhasrat untuk mendapatkan

kawasan ini dari Perak.

Bagi Sultan Perak, Sultan Shahabuddin Riayat Shah (1830-1851), sultan ke 21, baginda merasa tercabar dengan pencerobohan ini. Baginda mengistiharkan perang untuk mengambil kembali wilayahnya tetapi dihalang oleh British yang mahu menjadi orang tengah dalam penyelesaian masalah tersebut. Masalah pendudukan Lembah Kerian ini akhirnya dapat diselesaikan apabila Tunku Daei yang menggantikan ayahandanya dengan gelaran Sultan Zainal Rashid Muazam Shah (1845-1854) akur dengan arahan Siam supaya menyerahkan kembali kawasan ini kepada Perak. Satu upacara serah terima kawasan telah berlangsung pada 5 Februari 1848.<sup>60</sup>

### **3.6 PERSEMPADANAN TAHUN 1867-69**

Penyelesaian masalah Lembah Kerian telah memulihkan kembali hubungan antara Pulau Pinang dengan Kedah. British sentiasa berusaha mengatasi permasalahan yang timbul demi menjaga kemajuan perdagangannya di samping mengharapkan keuntungan-keuntungan lain yang boleh mereka perolehi. Keamanan membenarkan penduduk menjalankan kegiatan ekonomi seperti biasa. Di kawasan ini keamanan membolehkan penduduk membuka kawasan baru untuk menjalankan kegiatan pertanian, khususnya untuk tanaman padi, tebu, kelapa, ubi-ubian dan sebagainya. Pembukaan kawasan pertanian baru telah menggalakkan penduduk berhijrah ke kawasan ini dan menambahkan bilangan penduduk. Umpamanya, penduduk kawasan ini pada tahun 1786 dianggarkan hanya berjumlah seramai 500 orang tetapi telah

meningkat kepada 6,185 orang pada tahun 1820. Tujuh tahun kemudian bertambah kepada 20,734 orang dan pada tahun 1831 berjumlah seramai 45,953 orang. Penduduk terus bertambah dengan pesatnya membawa kepada jumlah 64,816 orang pada tahun 1860. Jumlah penduduk Province Wellesley ini melebihi sedikit daripada penduduk Pulau Pinang yang berjumlah seramai 59,956 orang pada tahun yang sama.<sup>61</sup>

Pertambahan penduduk yang pesat selain daripada dapat menyediakan tenaga buruh bagi kemajuan ekonomi, ianya sedikit sebanyak telah menimbulkan masalah sosial seperti jenayah dan sebagainya. Kejadian jenayah sering berlaku dan sukar di kawal di kawasan sebelah timur yang tidak bertanda dan bersukat. Permasalahan ini sering menjadi modal kepada British untuk memperbetulkan semula garisan sempadannya, dan dalam masa yang sama mencari peluang untuk menambahkan kawasan.<sup>62</sup>

Jenayah yang paling rumit untuk diatasi ialah rompakan yang sering dilakukan oleh penduduk jiran, Kedah. Dalam keadaan ketidaksempurnaan garisan sempadan dan kekurangan badan penguatkuasaan undang undang, rompakan mudah terjadi dan sering terlepas dari sebarang hukuman. Oleh kerana hal sebegini semacam terbiar dan sering berlaku mewujudkan keadaan seolah-olah berlakunya perang saudara. Keadaan menjadi bertambah genting lagi apabila di sebelah Kedah (bagi kawasan sempadan bertanda kekal) banyak pula terdapat rumah perjudian, kedai candu dan arak yang diharamkan kewujudannya di Province Wellesley.<sup>63</sup>

Jenayah semakin berleluasa apabila adanya sikap melindungi mereka di sebelah Kedah. Umpamanya, pada tahun 1862, Penghulu Kota telah bersubahat sama dengan perompak perompak di Province Wellesley apabila mereka melarikan diri ke sini. Begitu juga pada tahun 1865, apabila Syed Hussain bersama-sama 40 orang pengikutnya telah melakukan keganasan di Teluk Air Tawar yang berkesudahan membawa kepada perang saudara apabila penduduk tempatan bertindak melawan. Syed Hussain dapat ditewaskan dan berundur ke Kedah. Apabila Residen Konsular Pulau Pinang meminta agar diserahkan pesalah ini, pihak Kedah pula berdegil. Setelah campur tangan Siam, barulah pesalah ini dibicarakan, tetapi di Bangkok.<sup>64</sup>

Permasalahan lain yang mengganggu Province Wellesley ialah "cukai kepala atau kerah" dan cukai rumah. Hal ini hanya wujud di Kedah sahaja. Masalah timbul apabila penghulu di Lembah Kerian mengutip cukai tersebut daripada penduduknya, dan mengutip cukai yang sama daripada penduduk dalam kawasan Province Wellesley. Beliau mengaku sebilangan daripada penduduk adalah orang-orangnya. Permasalahan di atas telah menggugat sistem pentadbiran di Province Wellesley, terutamanya dalam melaksanakan undang undang. Badan penguatkuasa yang terhad dan keadaan sempadan yang tidak sempurna kedudukannya telah mencabar kewibawaan British sebagai pihak pelaksana undang-undang. Inilah yang menjadi rentetan peristiwa kepada perkembangan sempadan selanjutnya.

Penyelesaian kes di Kota pada tahun 1844 dan di Kerian pada

awal tahun 1848 telah membuka satu ruang baru kepada British di Pulau Pinang memulakan jarumnya kembali. Pada 28 Julai 1848 Kapten J. Ferrior Penguasa di Province Wellesley dengan berpandukan formula dari surat James Low kepada Raja Ligor pada tahun 1832, telah menulis untuk menggariskan kedudukan sempadan yang tidak begitu jelas dari Sungai Sintuk ke Bukit Jelutong. Keadaan ini berlaku kerana pada tahun 1832 kerja-kerja hanya terbatas kepada memacakkan batu sempadan di tiga tempat sahaja dan bukannya menyukat dan membuat penandaan sempadan. Alasan yang diberikan pada masa itu adalah kerana keadaan tanah yang berbukit-bukit dan berhutan tebal menyulitkan kerja-kerja penyukatan. Selain daripada itu wakil Raja Ligor perlu balik segera dan tidak diberi kuasa untuk melakukan kerja-kerja penandaan sempadan. Keadaan ini telah menyebabkan ketentuan kawasan di atas tanah, sukar ditanda apabila batu di Sungai Sintuk dengan di tepi Sungai Kerian berada dalam jarak yang jauh.<sup>65</sup>

Masalah interpretasi ayat juga menimbulkan kekeliruan dari segi maksudnya. Perjanjian menyatakan:

".....mudik Sungai Sintuk dalam arah lurus ke Bukit Mertajam, kemudian dari Bukit Mertajam....".

Apa yang hendak diinterpretasikan ialah dalam arah lurus itu dari mana mulanya? Ini kerana sungai itu dikatakan mempunyai 52 lengkok dari kualanya sampai ke Kampong Sintuk. Jika dibuat garis rentasan lurus, sudah tentu bagi setiap kiri dan kanan sungai itu akan masuk ke kawasan Province

Wellesley dan Kedah (Kota). Usaha ini tidak mendapat reaksi positif dari pihak atasan British di Pulau Pinang. Hal ini disebabkan perundingan mesti dibuat dengan Siam walaupun Sultan Kedah diberitahu dan diminta membuat perundingan. Permasalahan di atas sering membuatkan hubungan antara Pulau Pinang dengan Kedah tegang. Kepimpinan yang silih berganti di Pulau Pinang dan di Kedah dalam jangka masa berterusan dapat meredakan keadaan walaupun tidak dapat menyelesaikan semua perkara.<sup>66</sup>

Perpindahan ibu pejabat Negeri Selat dari India ke Pejabat Tanah Jajahan di London pada tahun 1867 membuka era baru dalam siri-siri penjajahan British di negeri Melayu. Rintisan usaha Gabenor Butterworth dan Kolonel Cavanagh diteruskan oleh Kolonel Harry St. George Ord. Di Kedah pula Sultan Ahmad Tajuddin digantikan oleh Sultan Zainal Rashid (1845-1854) dan kemudiannya diganti oleh Sultan Ahmad Tajuddin Mukarram Shah III (1854-1879). Selepas empat bulan berada di Singapura, Kolonel Ord berupaya memujuk Sultan Ahmad turun ke Singapura pada 11 Ogos 1867 untuk perundingan permasalahan di atas. Kejayaan ini adalah atas usaha bersama Tan Kim Cheng yang menjadi Konsol General Siam di Singapura dan penasihat peribadi yang paling dipercayai oleh Sultan Kedah. Perundingan ini akhirnya menghasilkan satu **Memo Persetujuan** (*Memo of Agreement*) yang ditandatangani pada 19 September 1867. Memo ini kemudiannya akan menjadi syarat-syarat utama perjanjian rasmi yang akan dikemukakan kepada kerajaan British dan Siam untuk pengesahan. Sebagai menghargai kerjasama

Sultan, Kolonel Ord telah membayar semula saguhati Sultan Ahmad yang digantung oleh Kolonel Cavanagh sebelum ini. Memo ini menggariskan :<sup>67</sup>

"Memo of an agreement between His Excellency the Governor of the Straits Settlements and His Highness the Rajah of Quedah to be substituted for the Treaty with Ligor (Siam) dated 2 November 1831 which defines the Eastern Boundary of Province Wellesley, and in modification of the treaty between Great Britain and the Kingdom of Quedah confirmed by the Governor General in Council in the month of November 1802.

1. The boundary between Province Wellesley and Quedah in place of following the irregular and tortuous line it does at present, to be henceforth defined by a line, drawn from the existing frontier pillar on the bank of river "Muda" to a point on the extreme eastern end of the Mertajam range and thence along the top ridge of the Puncore Hill to the frontier pillar on the back of the river "Krean", the land thus acquired by the English Government being, acre per acre, nearly the same as surrendered to Quedah.
2. The third clause of the last mentioned treaty of 1802 which agreed that no duty or customs shall be levied by the Government of Quedah on any land of provisions wanted for Pulo Pinang, to be repaid and the British Government agrees to permit the Rajah of Quedah to levy a duty upon cattle, grain and other provisions according to the tariff annexed to this treaty.
3. It is further agreed for the protection of revenue and prevention of smuggling in the respective countries that no opium, spirit or gambling shop shall be licenced by either Government within 2 miles distance from the new boundary line.
4. This Memo of Agreement to be embodied in a treaty to be submitted for confirmation of the Government of Her Majesty Queen Victoria and His Majesty the King of Siam and pending such confirmation it is agreed between the Governor of the Straits Settlements and the Raja of Quedah in the interests of the respective countries that the provisions of the agreement shall come into operation function in consideration of which the Governor engages to continue to the Rajah of Quedah the

payment of his annuity (at present suspended) in accordance to the treaty 1802 and to pay such arrears<sup>68</sup> as may have accumulated to there on.

Dated at Singapore on the 19 September 1867.

#### Tariff

Rice at \$8.00 per coyan for 40 piculs.  
Paddy at \$4.00 per coyan for 800 gantangs  
Cattle at \$1.00 per head  
Ducks at \$1.00 per 100  
Fowls at \$1.00 per 100

Kegembiraan yang dirasai oleh Kolonel Ord tidak lama. Pada 30 Disember 1867 Sultan Ahmad Tajuddin III membuat keputusan tidak mahu menandatangani perjanjian yang disediakannya. Beliau amat kecewa, lebih-lebih lagi setelah sultan memberi tahu:

".....he positively refused to sign it, and said that nothing but an order from Siam should induce him to do so".

Kolonel Ord kesal dengan sikap sultan. Sementara itu Mr. Lewis, Konsol Siam di Pulau Pinang gagal memujuk sultan untuk menandatangani surat perjanjian. Sebagai tindak balas, Kolonel Ord menggantung semula ganjaran dan memutuskan perhubungan dengan Sultan Ahmad Tajuddin.<sup>69</sup>

Sultan tidak menandatangani perjanjian tersebut kerana khuatirkan tindakan Siam yang tidak merestuinya tanpa merujuk kepada mereka terlebih dahulu. Selain daripada itu sultan juga bimbang sekiranya dengan menandatangani perjanjian tersebut, baginda akan kehilangan dua

batang sungai yang amat penting dari segi penguasaannya.

Selaku pegawai yang sentiasa optimis, Kolonel Ord membuat laporan ke Pejabat Tanah Jajahan dan juga menulis terus kepada Raja Siam untuk memberitahu hal yang telah berlaku. Satu salinan surat tersebut telah dimajukan kepada Konsul British di Bangkok untuk dikemukakan kepada Kalahom (Perdana Menteri).<sup>70</sup> Raja Siam memberi reaksi positif, pada 16 Januari 1868 Raja Siam telah melantik satu Suruhanjaya bagi negeri selatan Siam dan negeri Melayu yang bernaung di bawahnya. Tugas mereka untuk memeriksa, menyiasat dan membuat keputusan terhadap aduan bagi pihak Raja Siam. Mereka yang dilantik ialah Phra Shepa Prachun Raja iaitu pegawai kedua di pejabat Kalahom dan Phra Phichet Prahit iaitu Tan Kim Seng<sup>71</sup>

Dalam menyelesaikan kes ini, Pesuruhjaya yang akan menyiasat di Ujong Salang akan turut menemui Kolonel Ord. Mereka ialah Phra Debia Phrajud dan Phra Bedis Banij Siam Bejit Bhatcy. Mereka tiba di Pulau Pinang Pada 15 Februari 1868. Setelah berbincang, mereka bersetuju dengan draft perjanjian Kolonel Ord. Mereka memohon tempoh 48 jam bagi berjumpa Sultan Kedah.<sup>72</sup>

Kolonel Ord sekali lagi dikecewakan apabila Pesuruhjaya tersebut terpaksa balik semula ke Ujong Salang besoknya. Dengan penjelasan Mr. Lewis, beliau berkeyakinan mereka akan turun semula ke Singapura. Pada 20 Mac 1868 mereka telah datang bersama-sama Sultan Kedah. Pada 21 Mac, perjanjian ini telah ditandatangani setelah mengubah beberapa perkara kecil

yang diminta oleh pihak Siam, terutamanya meminta British mengiktiraf rakyat Siam menggunakan Sungai Muda dan menulis nama mereka sebagai pihak yang menandatangani, bukannya Sultan Kedah.<sup>73</sup>

Hasil perjanjian ini telah dimajukan oleh Kolonel Ord ke Pejabat Tanah Jajahan untuk kelulusan. Dalam masa yang sama beliau telah meminta untuk diberi satu kuasa khas sebagai perunding British di negeri-negeri Melayu.<sup>74</sup> Surat Kolonel Ord tidak disokong oleh Pejabat Tanah Jajahan untuk kelulusan Pejabat Luar Negri.<sup>75</sup> Keadaan bertambah kecoh lagi apabila H. Alabaster, Pemangku Konsol di Bangkok memaklumkan bahawa Kolonel Ord telah membelakangi beliau dalam berurusan dengan Siam.<sup>76</sup> Pejabat Undang-Undang bagi Hal Ehwal Tanah Jajahan telah dirujuk,<sup>77</sup> dan keputusannya mereka tidak meluluskan Perjanjian 21 Mac. Alasannya Kolonel Ord tidak ada kuasa perundingan atas jawatannya sebagai Gabenor Negeri Selat.<sup>78</sup>

Sebagai gantinya, Pejabat Luar Negeri telah mengambil alih tugas ini. Satu draf perjanjian yang hampir sama dipertanggungjawabkan kepada Thomas George Knox untuk berunding dengan Siam.<sup>79</sup> Pandangan Kolonel Ord juga diambil kira.<sup>80</sup> Satu persetujuan tercapai, maka termetrilih satu perjanjian baru antara Kerajaan British dengan Kerajaan Siam mengenai hubungan negeri Kedah dengan Pulau Pinang/Province Wellesly pada 6 Mei 1869.<sup>81</sup> Wujudlah satu garisan sempadan baru yang kekal sampai ke hari ini.

Dengan merujuk kepada perjanjian di atas kawasan yang


menjadi sempadan Province Wellesly ialah:

".....that is to say, on the west by sea, on the north by the right bank of the River Muda, on the south by the right bank of the River Kurreean (Kerean), and on the east by a line running south from a spot on the right bank of the River Mudah, opposite the existing frontier pillar at Sematool in a straight line to a point on the extreme eastern end of the Mertajam range of hills. Thence along the top ridge of the Punchore Hill to the existing frontier pillar on the right bank of the River Kurreean/about 400 English yards above and east of Bukit Tunggal. ...."

### 3.7 KESIMPULAN

Maka tercapailah hajat British untuk membetulkan sempadan di sebelah timur. Dalam masa yang sama British telah mendapat sempadan di utara yang lebih selesa. Selama ini pengawalan di Kuala Muda menghantui British. Perjanjian tahun 1800 dan 1831 memberikan British tebing kiri Sungai Muda sahaja (arah meghilir). Dengan itu laluan sungai berada dalam tangan Sultan Kedah atau wakilnya yang jadi pemajak. Inilah yang sering diperbahalkan oleh mereka kerana cukai di Kuala Muda. Beberapa kali British berusaha mendapatkan kelonggaran tetapi masih gagal termasuk dalam perjanjian tahun 1831. Apa yang menjadi perjuangan mereka ialah hasil bijih dan hasil hutan dari Patani yang melalui kawasan atau laluan ini akan menjadi bertambah mahal apabila dikenakan cukai di Kuala Muda sebelum sampai ke Pulau Pinang. Lagipun laluan ini adalah laluan utama dan terdekat dari Pulau Pinang ke Patani. British tidak ada pilihan lain lagi untuk membawa hasil dari Patani. Bijih amat diperlukan untuk pasaran. Sumbangan dari Patani dan Hulu

Peta 3.5. Perubahan Sempadan di Province Wellesley Dari Tahun 1800 - 1869



Sumber: ANM No.48 (UBAHSUAI) dan CO273/13 ff 428-483.

Perak agak besar juga pada perkiraan 500 bahara setahun pada tahun 1820an. Kesukaran laluan menyebabkan banyak bijih dari Patani tersekat. Mencari bijih hanya kerja sampingan kepada penduduk tempatan. Bagi lombong-lombong yang diusahakan oleh Orang China, jika banyak sekatan, mereka akan berpindah ke tempat lain. Sebab itulah British bersungguh-sungguh mahu memastikan jalan laluan di Sungai Muda sentiasa berada dalam kawalannya supaya aliran hasil sentiasa terkawal. Hasrat ini akhirnya tercapai jua.<sup>82</sup>

Bagi membetulkan ".... mudik Sungai Sintuk dalam arah lurus ke Bukit Mertajam,...." dan kawasan yang sering dipertikaikan telah diselesaikan dalam perjanjian ini. Perjanjian 1831 hanya memberi British kawasan sebelah kanan (arah menghilir) Sungai Perai dan anak sungai yang dilalui oleh garisan sampai ke Semetool. Ini bermakna sebelah kiri sungai Perai dan sebelah kanan Sungai Sintuk masih berada dalam kawalan Kedah. Kawasan yang bertanah pamah dan berpaya air tawar di sini amat sesuai untuk tanaman padi. Demikian juga dengan bijih timah yang terdapat di hulu Sungai Perai dan persekitaran kaki banjaran Bukit Mertajam dan anak-anak sungainya turun ke Sungai Kulim dan masuk ke Sungai Perai masih lagi berada dalam kawasan Kedah. Ini juga mendatangkan kerugian kepada British apabila cukainya dapat kepada Kedah. Kawasan idaman mereka Kota, masih lagi berada di Kedah. Hanya Kampong Sintuk dan Tanjung Putus dapat disahkan berada dalam Province Wellesley. Bagi kampong lain di hulu dari Kota seperti Pengkalan Tambang dan Kampong Terus yang ramai penduduk, tetap

akur di bawah Kota. Penduduk di sini yang boleh menjadi sumber tenaga dalam membuka kawasan pertanian baru tidak dapat digunakan. Penyelesaian perjanjian di atas menyelesaikan sama masalah perluasan kawasan pertanian yang diperlukan di sini.<sup>83</sup>

Pertambahan kawasan tanaman padi amat diperlukan kerana Pulau Pinang masih bergantung dengan padi dari luar untuk kegunaan sendiri. Hanya di Province Wellesley sahaja yang mampu menampung keperluan sendiri. Oleh itu, tambahan perlu diimpot dari kawasan sekitar dan Sumatera. Pertambahan kepada kawasan baru membolehkan banyak kawasan dibuka.<sup>84</sup>

Penyelesaian garisan sempadan juga telah memudahkan pengawalan kepada peraturan akibat dari aktiviti di seberang sempadan. Jika sebelumnya, di Kedah, aktiviti candu, alkohol dan judi adalah dibenarkan. Ini telah menarik ramai penduduk Province Wellesley menyeberang sempadan kerana ditempat mereka tidak kedapatan. Akibatnya banyak berlaku kesan jenayah seperti kecurian, perompakan dan mengganggu orang ramai di sebelah Province Wellesley. Apabila tindakan mahu diambil, mereka pula lari ke seberang sempadan. Dalam perjanjian ini telah menggariskan bahawa dalam jarak dua batu dari tepi sempadan tidak dibenar menjalankan aktiviti penjualan arak dan perjudian. Secara langsung atau tidak penduduk yang ramai dapat disalurkan kepada kegiatan perekonomian dan bukan lagi menjadi sumber masalah dan kemudiannya membawa kepada perbalahan.<sup>85</sup>

Selaku pihak yang terhukum, Sultan Kedah tidak mempunyai

suara dan kuasa. Kawasanya seluas kira-kira 50 batu persegi terlepas lagi dari pegangannya. Untuk kedua kalinya pemberian wilayahnya dibuat oleh pihak lain tanpa merundinginya. Lebih teruk lagi laluan sungai di Kuala Muda yang menjadi sebahagian pendapatan tetap dan sebagai senjata untuk menangani karenah British di Pulau Pinang turut terlepas kali ini. Selain dari itu Sultan Kedah juga kehilangan dalam monopoli perniagaan candu, alkohol dan lesen perjudian apabila perniagaan ini ditutup dari beroperasi di tepi sempadan. Sultan Kedah tidak mudah mengalah dan tunduk pada perjanjian di atas. Banyak bukti kemudiannya British terpaksa tunduk dan akur juga dengan tindakan-tindakan Sultan Kedah yang mempertahankan haknya sebagai Sultan yang berkuasa di negerinya.<sup>86</sup> Secara ringkasnya, Sultan Kedah berjuang mempertahankan haknya, manakala British pula terus mendesak satu kawasan baru yang boleh menjamin keselamatan dan kemajuan perdagangan mereka.

Dari segi perkembangan sejarah sempadan negeri, perjanjian ini memperlihatkan satu era baru dalam bentuk kawasan yang berperenggan, iaitu mempunyai sempadan. Ia dipisahkan oleh dua buah sungai bersama satu garisan lurus yang secara kebetulan sebahagian dari kawasannya menggunakan keadaan tempat yang bertanda kekal di atas muka bumi. Walau pun perjanjian tahun 1800 dan 1831 telah memperlihatkan keadaan yang sama tetapi pada kali ini ia lebih jelas kedudukannya. Usaha pihak British tidak berhenti di sini. Perkembangan di sekeliling dan keperluan mereka kepada perdagangan yang lebih luas, memaksa mereka bergerak ke Perak pula kemudiannya.

## NOTA KAKI

1. Kehadiran mereka di Kedah, lihat R. Bonney, **Kedah 1771-1821: The Search for Security and Independence**, Kuala Lumpur, Oxford University Press, 1971, hal. 27. Sementara di Balambangan, lihat Mohammad Raduan bin Mohd Ariff, "Dari Pemungutan Tripang ke Penundaan Udang: Satu Kajian Mengenai Sejarah Perkembangan Perusahaan Perikanan di Borneo Utara, 1750-1990", Tesis Ph.D., Kuala Lumpur, Jabatan Pengajian Asia Tenggara, Universiti Malaya, 1993, hal. 126.
2. Pengalaman terhalau dari Patani pada tahun 1622, Ambon 1623, Kedah dan Balambangan pada tahun 1773 memberi kesan yang mendalam dalam hubungan dagang British di Negeri Melayu. Tanpa mempunyai pusat pengumpulan dan pengedaran barang, British tidak akan kemana dalam menyaingi Belanda dan menawan pasaran barang China yang amat diperlukan terutamanya teh. Usaha mereka di Kedah pada tahun 1771-1773 dibincang dengan mendalam oleh R. Bonney, **Op. Cit.**, hal. 27-51 (Bab 3).
3. Lihat E.H.S. Simmonds, "Francis Light and the Ladies of Thalang", **JMBRAS**, Vol. 38, Pt. 2, 1965, hal. 217 & 227.
4. E.H.S. Simmonds, **Op. Cit.**, hal. 213-228.
5. Soal lanun ini masih boleh diperbahaskan. Sebagai kawasan laluan, semua kenderaan yang lalu seharusnya membayar cukai sebagai ganjaran menggunakan laluan. Mana mana kapal yang tidak membayar cukai ini sahaja yang diserang. Itulah tanggapan masyarakat setempat pada masa itu. Hal ini sama seperti membayar tol pada hari ini.
6. Dalam erti kata lain, kawasan di sini menjadi setor atau emporium kepada barang perdagangan. Peranan ini telah dimainkan oleh Melaka dizaman kemuncaknya, kemudian Acheh dan Kedah. Demikianlah dengan Pulau Pinang muh dijadikan sedemikian rupa oleh British pula kerana kedudukan dan potensi hasil yang ada di sekelilingnya.
7. Sama ada Kedah merdeka atau **di bawah Siam** merekalah (British) yang menentukannya kepada kita hari ini. Semasa menduduki Pulau Pinang, Kedah dikatakan oleh F. Light sebuah negara yang merdeka, tetapi apabila telah ditakluki oleh Siam, dan British muh berdagang dengan Siam, Henry Burney telah ditugaskan untuk meminta pula pengiktirafan Siam akan kedudukan mereka di sana. Bagi masyarakat Melayu mereka mungkin pernah berperang

dengan Siam, tetapi mereka tidak pernah menerima Siam sebagai **Tuan Besar** yang perlu mereka akur kecuali selepas tahun 1821 di Kedah dan 1839 di Kelantan. Patani telah menerima nasib yang lebih awal pada tahun 1786, tetapi pemberontakan demi pemberontakan sejak tahun 1791, adalah bukti ketidak terimaan mereka (Orang Melayu) kepada penjajahan Siam. Keterangan mengenai pegawai Siam datang ke Pulau Pinang dalam perjalanan untuk berperang dengan Burma, lihat "Notices of Pinang, Proclamation" dalam akhbar **Pinang Gazette**, 2 Nov. 1850.

8. Lihat "Notices of Pinang, Proclamation", dalam akhbar **Pinang Gazette**, 2 November 1850, lihat sama SSFR (IOL), Vol. 9, Laporan R.J. Farquhar ke Gabenor General, 18 September 1805, tanpa folio.
9. Selepas pendudukan Pulau Pinang pada akhir tahun 1786, Kedah telah diarahkan oleh Siam untuk mempertahankan Pulau Ujong Salang dari serangan Burma. Lihat R. Bonney, **Op. Cit.**, hal. 82.
10. Keterangan penuh perjanjian ini, lihat **A Collection of Treaties, Engagements and Sunnuds, the Treaties, etc, Relating to Bengal, Burmah and the Eastrn Archipelago**, Culcutta, Savielle and Cranenburgh, 1862, hal. 257-259.
11. John Anderson menganggarkan kerugian Kedah dalam perdagangan akibat pembukaan Pulau Pinang sebanyak \$20,000.00 setahun. Dalam kajian lain, Kedah kerugian sebanyak \$56,000.00 setahun. Lihat Zaharah Haji Mahmud, "Change in a Malay Sultanate: A Historical Geography of Kedah Before 1939", Tesis MA, Kuala Lumpur, Jabatan Geografi, Universiti Malaya, 1966, hal. 93. Beliau membuat kutipan dari Wan Ibrahim, "Cara cara mengutip hasil dalam negeri di zaman pemerintahan Sultan Abdullah Mukaram Shah", semasa perbicangan Persatuan Sejarah, Di Kolej Sultan Abdul Hamid, Alor Setar pada 18 Jun 1961.
12. Laporan awal terdapat dalam John Anderson, **Political and Commercial Considerations Relative to the Malayan Peninsula, MBRAS Reprint**, No. 11, Vol. 35, Pt. 4, (No. 200), Ulang Cutak, 1989, hal. Appendix liii. Kenyataan seterusnya dapat dilihat dalam kenyataan W.E. Maxwell pada tahun 1899 berbunyi "..... the Siamese Government neither makes nor maintains roads,....., these states all suffer from being regarded in Bangkok not as provinces to be developed but as source of revenue to be spent as capital. Sixty percent of this revenue to be spent at Bangkok," terdapat dalam "Notes of a Tour Through the Siamese States on the West Coast of the Malay Peninsula, 1900" oleh C.W.S. Kynnersley, **JSBRAS**, No. 36, Jul. 1901, hal. 49-66.

13. Lihat "Notices of Pinang", (ed.), J.R. Logan dalam **JIAEA**, Vol. 4, Siri 1, 1850, hal:636-637.
14. *Ibid*, hal. 639.
15. *Ibid*, hal. 638.
16. *Ibid*, hal. 639.
17. *Ibid* hal. 638.
18. *Ibid*, hal. 639.
19. Inilah pengakuan dari F. Light sewaktu beliau sampai ke Pulau Pinang. Beliau juga telah mengupah Orang Melayu di sini dan yang datang dari tanah daratan di seberang untuk menebang, menebas dan membersihkan hutan serta membuat kubu. Lihat "Notices of Pinang, Proclamation", dalam akhbar **Pinang Gazette**, 2 Nov. 1850.
20. Data data ini tidak menunjukkan keseragaman. Keadaan ini terjadi kerana belum ada lagi bincian rasmi. Hanya berdasarkan anggaran semasa oleh pihak pentadbir yang dikutip dari penulisan sebelum ini. Data tahun 1788, lihat L. A. Mills, **British Malaya 1824-67, JMBRAS**, Vol. 33, Pt. 3, (No. 191), 1960, hal. 52. Dari jumlah ini 2/5 daripadanya ialah Orang China. Data Tahun 1789, lihat artikel "Captain Light the Founder of Penang", dalam akhbar **Pinang Gazette**, 20 Oktober 1894 dan artikel "The Founder of Pinang", dalam akhbar yang sama, 22 Okt. 1901. Dalam tahun 1790, lihat K. G. Tregonning, **The British in Malaya, The First 40 Years 1786-1826**, Tuscon, University of Arizona Press, 1965, hal. 50. Data tahun 1795, lihat "The Founder of Pinang", **Pinang Gazette**, 20 Okt. 1901. Dari jumlah di atas, 3,000 darinya ialah Orang China. Data tahun 1804, lihat L.A. Mills, *Op. Cit.*, hal. 52. Data tahun 1807, lihat laporan EIC dalam akhbar **Pinang Gazette**, 10 Jul. 1852. Data tahun 1810, lihat Akhbar **Pinang Gazette**, 10 Jul. 1852. Bagi data tahun 1820, hanya anggaran penulis sahaja kerana terdapatnya laporan pada tahun 1824 berjumlah 35,995 orang dan tahun 1826/27 seramai 37,342 orang dalam **Pinang Gazette**, 10 Jul. 1852.
21. Lihat laporan R.J. Farquhar kepada Gabenor pada 18 Sep. 1805, dalam **SSFR (IOL)**, Vol. 9, tanpa folio.
22. K.G. Tregonning, *Op. Cit.*, hal. 61-64.
23. *Ibid*, hal. 121.

24. Lihat James Low, **The British Settlement of Penang**, Singapore, Singapore Free Press, 1836, dicetak kembali di Singapore, oleh Oxford University Press, 1972, hal. 15.

25. K.G. Tregonning, **Op. Cit.**, hal. 10.

26. **Ibid**, hal. 119. Rekod rekod yang ada juga menunjukkan impot ekspot Pulau Pinang ialah:

Tahun	1790	1791	1792
Ekspot	\$ 119,028.00	\$ 185,395.00	\$ 224,533.00
Impot	\$ 123,949.00	\$ 136,466.00	\$ 317,414.00
Jumlah	\$ 243,977.00	\$ 321,861.00	\$ 541,947.00

Sumber: SSFR (IOL), Vol. 9, Tanpa Folio.

27. Kepentingan Sungai Muda sebagai jalan laluan membawa hasil mahsul dari pendalamannya ke kuala dan sebaliknya tidak boleh dinafikan kepada kerajaan Kedah dan kemudiannya, Pulau Pinang. Kepentingan lain kawasan ini ialah lembah yang luas berupaya menjadi tempat tanaman padi, manakala di kawasan pendalamannya yang berbukit menghasilkan pula bijih. Dari sudut pemerintahan pula Kuala Muda memang pernah menjadi pusat pemerintahan dan pada zaman ini sekali lagi menjadi demikian. Perbincangan yang lebih lanjut pada bab ini dan bab seterusnya akan memperlihatkan lagi kepentingannya.

28. Persetujuan yang dicapai dalam perjanjian ini dapat dilihat dalam **A Collection Of Treaties, Engagements and Sunnuds**, **Op. Cit.**, hal. 260-263. Peristiwaran penyerahan dan pendudukan kawasan ini dibuat oleh Setiausaha kepada Gabenor W.E. Phillips pada 7 Jul. 1800. Lihat SSFR (RNLA), Vol. G4, f. 102.

29. Lihat laporan R.J. Farquhar kepada Gabenor, 18 Sep. 1805, dalam SSFR (IOL), Vol. 9, tanpa folio.

30. Kebanyakan data adalah selepas penaklukan Siam keatas Kedah. Data data ini bagi tahun 1810 ditemui daripada laporan pentadbiran Pulau Pinang dalam **Pinang Gazette**, 10 Jul. 1852. Untuk tahun 1815 dan tahun 1821, hanya anggaran sahaja berdasarkan laporan tahunan James Low pada tahun 1831 ada menyebut penduduk bagi tahun 1820 seramai 5,457 orang. Lihat SSFR (RNLA), Vol. W1, 20 Jan. 1831, ff. 106-171. Perkembangan penduduk di Pulau Pinang (termasuk Province Wellesley) dalam kajian bagi negeri Kedah, lihat Zaharah Haji Mahmud, "The Population of Kedah in the Nineteenth

Century", JSEAS, Vol. 3, Pt. 2, 1972, hal. 193-209.

31. Meski pun Siam berupaya mengeluarkan Burma dari wilayahnya dan juga menundukkan Patani pada tahun 1786, namun penentangan oleh kedua-dua pemerintah ini sering mengganggu gugat Siam dan juga Raja Ligor. Sultan Kedah telah menjadi mangsa keadaan dalam pertikaian tersebut apabila baginda diarahkan untuk membantu Siam dalam menangani masalah mereka dengan Burma dan Patani. Contohnya seperti menghantar tentera ke Patani pada tahun 1808 bagi memadamkan pemberontakan Patani. Demikian juga dengan penghantaran tentera merampas kembali Pulau Ujong Salang yang telah ditawan oleh Burma pada tahun 1814 dan juga penyerangan ke atas Perak pada tahun 1816 apabila Perak menolak Pertuanan Siam kepadanya. Gambaran perjuangan orang Melayu Kedah membantu Siam merampas kembali Pulau Ujong Salang, lihat Muhammad Yusoff bin Hashim, **Syair Sultan Maulana**, Kuala Lumpur, Penerbit Universiti Malaya, 1980, terutama hal. 203-386.
32. R. Bonney menggambarkan sikap cemburu Raja Ligor terhadap Sultan Kedah telah menjadi satu punca penaklukan Siam terhadap Kedah. Ini adalah berpunca dari kejayaan Sultan Ahmad Tajuddin, ".....holding the same rank of Chau Phra Phya, especially since Sultan Ahmad was younger in office and age. This was a source of great embracement and friction because Kedah was nominally under the superintendence of governor of Nakhorn Si Thamarat", R. Bonney, **Op. Cit.**, hal. 163.
33. Pada perkiraan awal, mungkin EIC menyangka cukup dengan penguasaan ke atas kawasan seluas itu. Apabila masa dan keadaan berubah, barulah mereka menyedari permasalahan sebenarnya disebalik keperluan kawasan seluas 84 batu persegi. Lihat perbincangan selanjutnya.
34. Lihat laporan R.J. Farquhar kepada Gabenor, 18 Sep. 1805, dalam SSFR (IOL), Vol. 9, tanpa folio.
35. Jual beli negeri tidak pernah berlaku dalam sejarah Kerajaan Melayu sehingga kedatangan kuasa barat khususnya British. Hal ini tidak berakhir pada kali ini sahaja, malah timbul kembali semasa mahu membuat penyelesaian kes Hulu Perak/Reman (Siam). British tidak pernah menghormati hak dan kepentingan kerajaan Melayu sehingga mengakibat sedikit demi sedikit wilayah yang sepatutnya milik Kerajaan Melayu terlepas ketangan Siam akibat dari pengiktirafan mereka.
36. Lihat surat Pesuruhjaya Syarikat di Kedah kepada Sultan Kedah dalam, SSFR, (RNLA), Vol. G1, ff. 39-41.

37. Sultan Kedah pernah memberi amaran kepada Gabenor W. E. Philips dalam suratnya bertarikh 13 Syawal 1234 besamaan 8 Ogos 1819 bahawa persoalan muara Sungai Muda dengan bayaran tahunan 10 ribu dollar Sepanyol adalah tidak berkait. Lihat SSFR (RNLA), Vol. F2, f. 161. Sultan terus mempertahankan haknya iaitu 10 ribu dollar kerana pendudukan EIC keatas Pulau Pinang, bukannya ada janji sampingan untuk kemudahan mendapatkan kawasan baru. Surat surat baginda seterusnya seperti September 1819 dan 27 November 1819 dapat dilihat dalam SSFR (RNLA), Vol. F3, ff. 6-7 dan 20-22.
38. Tunku Sulaiman ialah adik sebapa kepada Sultan Ahmad Tajuddin II dan sebu sebapa dengan Tunku Ibrahim Raja Muda melalui ibu mereka Che Bonda (gundik). Semasa pertikaian tuntutan waris ketakhtaan antara Tunku Pengiran (Sultan Ahmad) dan adik beradiknya terhadap Yang Di Pertuan Muda Perlis dan Kedah yang menjadi pemangku sultan, beliau kelihatan tidak memihak dan telah membawa diri ke Sungai Perai dan mendirikan **Kotanya** sendiri. Perpindahan ini adalah dengan restu Yang Di Pertuan Muda dan Gabenor Mac Alister. Jika pada masa ini kemungkinan tarikhnya sebelum tahun 1804 iaitu sebelum Yang Di Pertuan Muda turun tahta dan masa Mac Alister menjadi gabenor. Lihat R. Bonney, **Op. Cit.**, hal. 114 dan surat Tunku Sulaiman kepada Mr. Wilkinson pada 20 Saaban 1246 bersamaan 21 Februari 1831 dalam SSFR (RNLA), Vol. F5, ff. 211-219.
39. Perpaduan mereka wujud dalam setiap kali pemberontakan secara besar besaran pada tahun 1831 dan 1838/39. Namun sebenarnya banyak lagi percubaan percubaan oleh kerabat terdekat terutamanya Tunku Abdullah mengetuai penyerangan keatas Siam di Kedah tetapi gagal kerana kekuatan Siam dan campor tangan EIC dalam menghalang percubaan serangan. Lihat kenyataan luahan rasa kecewa Sultan Kedah terhadap Pulau Pinang yang sering menghalang perjuangannya dan pengikut pengikutnya dalam menentang Siam dalam surat baginda bertarikh 3 April 1837. Lihat **The Burney Papers**, Vol. 3, Pt. 2, Bangkok, Vajiranana National Library, 1912, hal. 402-403.
40. Penaklukan keatas Kedah mengakibatkan terhentinya penghantaran barang makanan seperti beras, daging (binatang hidup) dan sayur sayuran dari Kedah ke Pulau Pinang apabila tentera Siam membuat pengawasan di perairan antara Kedah dan Pulau Pinang. Barang makanan semakin berkurangan kerana tidak diusahakan oleh penduduk dan binatang ternakan banyak untuk kegunaan tentera Siam di Kedah. Manakala impot dari Patani dan dari kawasan pendalam lain disekat. Inilah akibat/kesan dari perperangan. Persoalan inilah yang menjadikan perhubungan antara Pulau Pinang dengan Siam (Ligor) bertambah menarik lagi. Lihat perbincangan seterusnya.

41. Arahan pemergian dalam tugas ini lihat surat arahan W.S. Cracraft, Pemangku Setiausaha kepada kerajaan kepada Kapten Henry Burney, bertarikh 8 Januari 1825 dalam **The Burney Papers**, Vol. 1, Pt. 4, hal. 754-758.
42. Perbincangan penuh perjanjian, lihat **Treaties and Engagements Affecting the Malay States and Borneo**, (ed.), oleh W.G. Maxwell dan W.S. Gibson, England, Jas. Truscott, 1924, hal. 77-82.
43. Lihat SSFR (RNLA), Vol. A31, 19 Dis. 1826, tanpa folio.
44. Laporan penuh surat arahan ini terdapat dalam SSFR (RNLA), Vol. A65, 13 Jun 1829, ff. 432-433. Cadangan J. Low diterima oleh Robert Ibetson yang menjadi Residen Konsular di Pulau Pinang. Beliau telah menulis kepada Raja Ligor bagi membetulkan sempadan. Kenyataan ini dapat dilihat dalam SSFR (RNLA) vol. G4, f. 96.
45. Surat dari Raja Ligor terdapat dalam SSFR (RNLA), Vol. V5, ff. 169-171. Manakala surat kepada Tunku Sulaiman dari J. Low, SSFR (RNLA), Vol. F6, 9 Mac 1830, ff. 33-34.
46. Lihat SSFR (RNLA), Vol. F6, J. Low kepada Gabenor Siam di Kedah, f. 26.
47. Mengikut sumber Siam, Gabenor Kedah (Phra Phakdi Borirak-Saeng), adiknya Phra Senanuchit, Timbalan Gabenor dan askar askar Siam berundur dan membuat pertahanan di Phattalung, utara Singgora, Lihat Cyril Skinner, "Prince Damrong's Introduction to the Dispatches of 'Luang Udom Sombat'", **JMBRAS**, Vol. 54, Pt. 2, 1981, hal. 92.
48. Selain dari membuat kepongan di kawasan laut dan mengawal di sempadan darat, EIC juga membantu dengan membuat pengisytiharan kepada rakyatnya supaya balik dan menyerah diri dalam masa 5 hari. Perisyiharan juga dibuat untuk menangkap Tunku Sulaiman kerana didakwa terlibat sama dalam pemberontakan. Manakala Sultan Kedah telah diarah supaya berpindah ke Melaka. Lihat SSFR (RNLA), Vol. F5, ff. 55-59 dan 238-241 dan Vol. G4, f. 127. Lihat sama Nicholas Tarling, **British Policy in the Malay Peninsula and Archipelago 1824-1871**, Kuala Lumpur, Oxford University Press, 1969, hal. 39-40.
49. Butir penuh perjanjian, lihat SSFR (RNLA), Vol. G5, ff. 78-79 juga dalam **Treaties and Engagements Affecting the Malay States and Borneo**, Op. Cit., hal. 206.
50. Ini adalah terjemahan bebas dari bahasa Inggeris.

51. Jumlah 286 batu persegi dicatatkan oleh G. W. Earl dalam **Topography and Itinerary of Province Wellesley**, Penang, Pinang Gazette, 1861, hal. 2. Manakala T. Braddell dalam **Singapore and Straits Settlements, Described and the Arrangements**, Penang, Pinang Gazette, 1861, hal. 2 menggariskan keluasan Province Wellesley ialah 151,000 ekar. Jika berdasarkan 1 batu persegi bersamaan 640 ekar, ini bermakna ia seluas 235.9 batu persegi. Apakah catatan Earl berlaku salah cetak atau kenyataan Braddell yang lebih tepat sukar dipastikan pada keadaan masa itu.
52. Raja Ligor terpaksa menerima hakikat bahawa kejayaan menentang pemberontakan adalah dengan bantuan EIC. Lagi pun beliau telah menerima beberapa pucuk surat dari Pulau Pinang semasa pemberontakan termasuk surat dari R. Ibetson. Dalam Surat 14 Jun 1831, R. Ibetson menyatakan bahawa pemberontakan, bantuan EIC dan masalah sempadan adalah saling berkait. Penyelesaian masalah sempadan akan membantu penyelesaian yang lain. Lihat SSFR (RNLA), Vol. U1, ff. 50-52.
53. Ini dapat dilihat dari surat surat mereka yang menampakkan rasa bersalah jika tidak dapat membantu pihak yang lagi satu walaupun sebabnya diluar pengawasan mereka. Hadiah-hadiah juga telah diberi kepada Raja Ligor samaada oleh R. Ibetson, mahupun Gabenor General di India. Lihat surat Ibetson kepada Raja Ligor bertarikh 26 November 1831 dalam SSFR (RNLA), Vol. V5, ff. 97-98. Surat Raja Ligor kepada Kenneth Murchison, 14 Mac 1832 dalam SSFR (RNLA), F5, f. 263. Hadiah-hadiah terdapat dalam SSFR (RNLA), Vol. S2, f. 32. Masalah Tunku Sulaiman diselesaikan dengan memindahkan beliau di bawah pengawasan terus Raja Ligor di Kedah. Lihat SSFR (RNLA), Vol. F5, F. 262
54. Kelihatan hubungan baik ini seperti **ada udang di sebalik batu**. British amat mamerlukan perdagangan dengan Siam, manakala Siam (Raja Ligor) amat memerlukan EIC dalam mempertahankan keagungannya di Kedah.
55. Perang di Beruas dapat dilihat dalam J. M. Gullick, "Kedah 1821-1855, Years of Exile and Return" , **JMBRAS**, Vol. 56, Pt. 2, 1983, hal. 44-45. Lihat sama **The Burney Papers**, Vol. 3, Pt. 2, hal. 376-401.
56. Pemberontakan dan kesannya dapat dilihat: Peranan British Memantu Siam dibicarakan oleh Sherard Osborn, **The Blockade of Kedah in 1838**, Singapore, Oxford University Press, 1987. Pemberontak Melayu dan nasib mereka dibicarakan dengan panjang lebar dalam **Cases Heard and Determined in the Her Majesty's Supreme Court of the Straits Settlements 1808-1884**, (ed. and rep.), oleh James William Noroth Kyshe, Esq. Vol. 1, Somerset, England, Legal Library (Publishing) Service, 1885, hal. 18-74.,

Nasib Patani dan Kelantan, Lihat Ibrahim Sukri, **Sejarah Kerajaan Melayu Patani (Jawi)**, Pasir Putih, Kelantan, diterbit oleh Tengku Zainab binti Tengku Mutallib, Tanpa Tarikh, hal. 109-110.

57. Kenyataan ini dibuat oleh Gabenor Butterworth pada 7 Februari 1844 selepas pendudukan Sultan ke atas Krian dan Juga catatan J. Low dalam "Retrospect of British Policy from the Period of the First Establising of Penang 17 July 1786-1839". Kedua-dua kenyataan ini dikutip dari J.M. Gullick, "Kedah 1821-1855", Op. Cit., hal. 40.

58. Sempadan Kedah dengan Perak tidak pernah diketahui dengan tepat. Dari rekod EIC, pada tahun 1815, Sultan Perak, Sultan Manshor Shah ada membuat pengakuan bahawa Kerian adalah milik Kedah. Begitu juga sebelum ini F. Light ada menyatakan bahagian yang paling terkeselatan bagi Kedah ialah Kerian. Kalau mengikut tafsiran Melayu, Lembah Kerian. Barat pula Sungai Kerian. Jadi kedua dua kenyataan ini mengikut interpretasi masing masing. Itulah sebabnya apabila Sultan Kedah menduduki Lembah Kerian bahagian selatan, British begitu beriya iya mahu mengeluarkannya dari situ. Permasalahan ini (sempadan) dapat di lihat dalam Michael Topping, Esq. "Some Account of Kedah", **JIAEA**, Siri 1, Vol. 4, 1850, hal. 42, **The Burney Papers**, Vol. II, Pt. II, hal. 192, J.R. Logan, "Notes on Pinang, Kidah ,&", **JIAEA**, Siri I, Vol. 5, 1851, hal. 60-64. dan R. Bonney, Op. Cit., hal. 5 dan 139.

59. Lihat SSFR (RNLA), Vol. DD9, Residen Konsular ke Gabenor, 17 Nov. 1843, ff. 100-103. Surat antara Penang dan Perak, lihat SSFR (RNLA), Vol. G5, 22 Nov. 1843, f. 20, 9 Dis. 1843, f. 9.

60. Serah terima kawasan ini terdapat dalam surat Gabenor G.A. Bushly, 12 Feb. 1848, SSFR (RNLA), Vol. R15, ff. 73-82, Arahan memaksa Sultan Zainal Rashid (Tunku Daei) memulangkan kawasan terdapat pada surat Gabenor 31 Dis. 1847, ff. 61-63. Manakala tekanan daripada British dan arahan dari Siam, lihat J.M. Gullick, "Kedah 1821-1855", Op. Cit., hal. 63.

61. Data perangkaan penduduk Province Wellesley dari tahun 1786-1860 terdapat dalam T. Braddell, **Op. Cit.**, hal. Appendix.

62. Kawasan ini bermula dari Sungai Sintuk ke Sungai Kerian melalui banjaran dari Bukit Mertajam ke Bukit Tunggal.

63. Bagi menjamin keselamatan dan perlaksanaan undang undang, EIC telah menempatkan 22 buah balai dan pos keselamatan dengan kekuatan 124 orang. Jika dibandingkan dengan Pulau Pinang sendiri, hanya ada 16 buah balai

dengan 61 orang anggota. Dua buah balai tambahan sedang di bina di Province Wellesley, pada tahun 1860. Lihat SSFR (RNLA), Vol. R36, Gabenor Cavenagh kepada Calcutta, 21 Mac 1860, ff. 184-190. Masaalah di tepi sempadan, lihat "Kedah in the Reign of Sultan Ahmad Tajuddin III (1854-1879)", oleh J. M. Gullick, **JMBRAS**, Vol. 58, Pt. 2, 1985, hal. 118.

64. J.M. Gullick, "Kedah in the Reign of Sultan Ahmad Tajuddin III", Op. Cit., hal. 117.
65. Lihat surat surat Leftenan Kolonel J. Low kepada Gabenor pada 28 Jul. 1848 dan 17 Ogos 1848 dalam SSFR (RNLA), Vol. W13, f. 176 dan ff. 177-182.
66. Batu sempadan di Sungai Sintuk terdapat di atas pulau di kuala sungai tersebut (Sintuk). Hari ini batu itu telah tenggelam. Temubual dengan Encik Hassan bin Mahmud (70 tahun) di Kampong Sintuk, Sungai Dua, Seberang Perai pada 2 Nov. 1993.
67. Lihat CO 273/13: Gabenor Ord kepada CO, 31 Dis. 1867, ff. 464-465.
68. Sultan Ahmad Tajuddin III bertuah mendapat tunggakan dari tahun 1857-1867 iaitu kira kira \$100,000.00. Ini tidak sama dengan nasib yang menimpa ayahandanya dan juga nindanya yang telah kerugian tidak kurang dari \$35,000 kerana kes Kerian dan lain lain kes yang menyebabkan penggantungan saguhati tersebut. Dalam kes Kerian penggantungan telah di buat dari tahun 1844-1847. Tentang pembayaran semula saguhati ini, lihat surat Tan Kim Cheng kepada Sultan Kedah, 10 November 1867, yang memaklomkan bahawa elaun dan tunggakan telah dibayar oleh Gabenor seperti dalam SSFR (RNLA), Vol. F7, f. 116.
69. Lihat **A Collection of Treaties and Other Documents Affecting the States of Malaysia 1761-1963**, Vol. 1, (ed.), J. de. V. Allen, A. J. Stockwell dan L. R. Wright, London, Oceana Publication, 1981, hal. 147-148. Dalam koleksi ini tidak terdapat data tentang tarif sebagaimana yang terdapat dalam laporan bertulis antara Gabenor Ord kepada Pejabat Tanah Jajahan seperti dalam Nota Hujungan 67. (CO 273/13: Gabenor Ord kepada CO, 31 Dis. 1867, ff. 464-465).
70. Lihat surat Pemangku Konsul British di Bangkok kepada Gabenor Ord, 18 Mac 1868, dalam surat surat Pejabat Luar Negeri (F.O) kepada Pejabat Tanah Jajahan (C.O), terdapat dalam CO 273/23: ff. 185-207..
71. Lihat laporan Gabenor kepada CO, 26 Mac 1868, dalam CO 273/17: ff. 388-446, khususnya, ff. 417-424.

72. Ibid, f. 389.
73. Ibid, f. 392.
74. Ibid, ff. 400-403.
75. Lihat CO 273/17: CO kepada FO, 17 Mac 1868, ff. 452-458.
76. CO 273/17: Pemangku Konsul kepada FO, 18 Mac 1868, ff. 424-437.
77. CO 273/17: FO kepada CO, 7 Mei 1868, ff. 185-186.
78. CO 273/23: Pejabat Undang Undang Kepada FO, 13 Jul. 1868, ff. 388-390.
79. Bagi melihat perbandingannya, rujuk J.de V. Allen, et.al., **Op. Cit.**, hal. 149-156.
80. CO 273/29: Gabenor Ord kepada CO, 31 Mei 1869, ff. 600-615.
81. Dalam perjanjian ini Sultan Kedah turut sama menandatangani perjanjian, tetapi baginda tidak memainkan sebarang peranan dalam perundingan. Nasib baginda kali ini lebih baik daripada semasa Perjanjian 21 Mac 1868. Dalam perjanjian tersebut, baginda hanya menghadirkan diri sebagai pemerhati yang tidak dirundingi. Lihat C.D. Cowan, **Tanah Melayu Kurun Kesembilan Belas. Asal Usul Penguasaan Politik British**, Kuala Lumpur, Dewan Bahasa dan Pustaka, 1970, hal. 80.
82. Kenyataan ini adalah sebahagian (intipati) dari Artikel 3 perjanjian tersebut. Keterangan penuh lihat J. de V. Allen, et.al., **Op. Cit.**, hal: 153, dan W.G. Maxwell & W.S. Gibson, **Op. Cit.**, hal. 83.
83. Kelemahan dan kekurangan dalam perjanjian tahun 1831 telah diatasi. British dapat tambahan kawasan seluas kira kira 50 batu persegi lagi. Dengan ini banyak kawasan pertanian baru diperolehi dan dapat diusahakan. Sejajar dengan pertambahan penduduk, keluasan kawasan amatlah diperlukan. Namun penyelesaian permasalahan ini hanya berlaku pada masa yang singkat sahaja. Oleh kerana Sungai Muda itu panjang dan amat penting untuk jalan laluan, maka kemudianya Sultan Kedah mengenakan cukai laluan di kawasan negerinya pula. Bab seterusnya akan memperlihatkan kembali permasalahan ini.
84. Bagi kadar keluasan 41,493 ekar pada tahun 1860, mampu menghasilkan 8 juta gantang padi atau kira kira 24 ribu tan setahun. Jumlah ini mampu

menampung kegunaan sendiri di Province Wellesley. Bagi keperluan di Pulau Pinang pula, kawasan seluas 10,713 ekar dapat mengeluarkan hasil sebanyak 2 juta gantang atau 6 ribu tan padi setahun. Jumlah ini dapat menampung kira-kira 1/4 daripada keperluan kegunaan. Lihat T. Braddell, *Op. Cit.*, hal. 15.

85. Keseragaman peraturan dapat memudahkan penguatkuasaan undang-undang. Inilah kelebihan Perjanjian 1869 dan juga cita-cita British untuk menguatkuasakan undang-undang dan menjamin keselamatan. Bagi tujuan ini sebanyak 22 buah Balai Polis dan Pos Keselamatan dengan kekuatan anggota seramai 124 orang diwujudkan di Province Wellesley. Berbanding dengan di Pulau Pinang sendiri, hanya terdapat 16 buah Balai Polis Dan Pos Keselamatan dengan kekuatan anggota seramai 66 orang. Lihat SSFR (RNLS), Gabenor Cavenagh kepada Calcutta, 21 Mac 1860, ff. 184-190.

86. Kedah terus mendapat perhatian British apabila mereka memerlukan kepentingan baru, misalnya jalan laluan di Sungai Muda yang di luar dari sempadan mereka, kesan dari pemberontakan di Kulim pada tahun 1888 dan juga keperluan untuk laluan membina jalan keretapi bagi jalan perhubungan mereka seterusnya. Apabila getah mula diperkenal dan dikembangkan di Semenanjung Tanah Melayu, Kedah sekali menjadi perhatian mereka setelah Province Wellesley tidak dapat menampung keperluan keluasan tanah yang diperlukan. Rayuan untuk menggunakan kemudahan percuma Sungai Muda di luar kawasan Province Wellesley telah ditolak oleh Sultan Kedah semasa perbincangan dengan E. Satow di Bangkok sempena Pertabalan Putera Mahkota (Crown Prince) Siam pada awal tahun 1887. Lihat CO 273/150: E. Satow kepada Salisbury (FO), 15 Feb. 1887, dalam surat FO kepada CO, 4 Apr. 1887, ff. 347-348. Tuntutan British yang lain dan pentingnya Kedah dan Sultannya kepada British adalah sama pentingnya Siam kepada perdagangan mereka di rantau ini dibincangkan dalam bab-bab seterusnya.